

MULIMU WA LUSIKA

LOLU MASWE LO

 [Muzwale Neville uli, “Piho ye, kasamulaho wa kuba ni mukopano ni tukwata twa madikoni ni basepahali ba tabernakele la Bufaifi busihu, lu bala litaba ze fumanehile mwateni ili ze ka lukela kuba ku muuna kaufela, ku musali kaufela, yali mulateleli ya ketilwe wa bulumiwa bo, ya lata kuziba maikuto a katengo, bo mulisana ni mulisana wa mutusi. Ni bala litaba ze kakusasana cwana. Mutu ni mutu kaufela ateeleze hande ku zona ka mo mu konela.” Muzwale Neville ubala litaba ze tatama—Mu.]

[“Litaba ze ne li lukisizwe ni kuhatiswa ki ba katengo ka basepahali, ni madikoni ka tumelelano yetezi ni bo mulisana hamoho cwalo ni mulisana wa mutusi.]

[“Matepu kaufela a likutazo za Rev. William Branham a lukela kupangiwanga ki Fred Sothmann fela, kufitela ha ku ka zibahaliswa ki ba katengo. Luna ka nako ye hakuna bulumiwa bu sili bwa matepu bwa mahala bo luziba. Matepu a alumelelizwe ka mulao, mi hakoni ku atiswa ka buñata ki mutu kaufela kwanda Fred Sothmann kusina tumelelano ya hae ye ñozwi.]

[“Sa bubeli. Hakuna mutu ya ongaonga mikopano, ku lekisa libuka kamba matepu, kuñola libuka nyana, kufa tusila twa litapelo kamba makadi a mufuta kaufela, kamba kukupa limpo kaufela, ya sa zibahali ka keleke ye kamba mulisana wa yona. Ba eza cwalo ka bu ikangabeki bwa buhata, mi ha ba si ka fiwa mata a kueza cwalo.]

[“Sa bulalu. Keleke ye ha itumelangi fela bakutazi ba yona kwanda mulisana wa yona, Rev. William Branham, kuba ni lisebelezo kai kamba kai.]

[“Libaka za litaba ze liyemi sina cwana:]

[“Li tisizwe ku luna kuli bakutazi ba sweli kusilanga linaha kukena mwa liputeho za luna, ba bulela kuli ki ba siemba, mi ba lumiwa ki keleke ye kuli ba be ni mikopano ye.]

[“Lu se lu bulelezwi kuli batu ba sweli ku pulinta makadi ni libuka nyana, ba sweli kulumasila a litapelo ni zeñwi cwalo, inge kuli ba lumelelizwe ku eza cwalo ka keleke ye ni mulisana wa yona, ye si niti. Ikaba buitumelo haiba mu ka zibisa keleke ka mutu kaufela ya ka fumanwa asweli kueza cwalo.]

[“Litaba ze libalilwe ni ku lumelezwa ki mulisana Rev. William Branham, mulisana wa mutusi Rev. Orman Neville, ni katengo ka basepahali ni madikoni.”]

[Muzwale Neville cwale uli, “Mulena ami fuyole.” Mwa sebelezo ya manzibwana, 65-0801E, Muzwale Branham ubulela ka mo katengo ka baeteleli ba keleke kapangezi maikuto a. Hakuna manzwi fa tepu.]

Lika kaufela za konahala, ku lumela fela;
Ku lumela fela, ku lumela fela,
Lika kaufela za konahala, fela . . .

Halu inamiseni litoho zaluna.

Ndate yomunde wa lihalimu, lu itumezi kakusasana cwana kuli lwa kona ku lumela. Li ezipwe bunolo ka Mali a suluhile a Mwana Hao, Jesu, kuli lube bo muca sanda sa muhau wa Hae; ni kuba bana ba bashimani ni ba basizana ba Mulimu, kuya ka kuishuwa kwa Hae ka lifu la sifapahano, kuba baba bizizwe ka ku lumela ku Yena ni zuho ya Hae, mi cwale Moya o Kenile umonyehezi ka kutala mwahala lipilu zaluna.

² Lu itumezi ka kolo ye ya kutaha mo kakusasana cwana ili ku to i kabela mihupulo yaluna ni litumbo zaluna, kubulela ka lipina, bupaki, kubala kwa Lisamu, kubala kwa Linzwi la Hao, ni ku libelela ka likute kwa Moya o Kenile kuli utise ku luna Liñusa le li lukela kuba mwa hola ye. Alaba cwalo, Mulena. Lufumane tuso ka kuba mo kacenu. Mi haluka siya muyaho, lu bulele sina bani bene bazwa kwa Emausi kuli, “Kana lipilu zaluna ne li sa cisi mwahala luna ha Na sweli kuambola ku luna kakusasana wo?” Alaba lika ze, Mulimu wa Kuyakuile, ka Libizo la Jesu Kreste. Amen.

Ha muine.

³ Muzuhile cwani, balikani, mo, kwanu mwa tabernakele ni kwa balikani ba luna kwande mwa naha, kukalela kwa neku la Likamba la Wiko, hape kakusasana cwana, kuyofita kwa Likamba la Upa, ni mutulo ni mboela, ku baba teeleza ka mawaile.

⁴ Ki lizazi lelinde kwanu kwa Indiana, ku batile, nyana ni malu, silami, ki kokunde luli. Tabernakele itezi, mwa patelo kaufela ni kwa matuko a limota. Lu mwataswa tibelelo yetuna kuli Mulena a lu potele kacenu. Mi lu sepa kuli Mulimu u mifile lizazi lelinde kaufela ko muinzi. Mi ki lizazi lelinde, kakuli Mulena uli file. Hakuna taba ka buino bwa nako, ki lizazi lelinde. Lu tabile fa kuba mo, lutabile hape kuli luna ni kolo ya ku zibahaza kwa lifasi tumelo ya luna ku Jesu Kreste. Mi lu bata kunga kolo kaufela ye lukona kwa kufa ponahazo ya luna ya lilato la Hae ni Sa ezize ku luna. Kacenu lwa . . .

⁵ Ne ni filwe, ka mizuzu yelikani yefitile, kuba—zibiso yakuli ni eze, mi he Ni na ni lika zenyinyani ze Ni bata ku bulela. Mi

iliñwi ya zona, zibiso nei filwe ku na kuamana mukopano wa katengo ka baeteleli busihu bo buñwi. Mi ne kuna ni dikoni alimuñwi yana zwa mwa keleke ya tutezi kwa Arizona, yani ki Muzwale Collins, muzwale wa luna ya ipile. Mi ha sa li kwahule cwalo, ba, sikuwata sa baeteleli, ba ketile Muzwale Charlie Cox kunga sibaka sa hae ha saile cwalo. Mi Muzwale Charlie Cox uketilwe ka likute ki basepahali . . . kamba katengo ka madikoni ba keleke ye, kuli ange sibaka sa Muzwale Collins, ka nako yeo ali siyo.

⁶ Mi taba ye Ni bata ku bulela, hape, Ni bata ku itumela ku mina sicaba kaufela, kakuli babañwi ba ku mina mwa kona kuya kwa mandu kusika ba kale sebelezo ya ku foliswa busihu bwa kacenu, ka limpo ze nyinyani, ze filwe. Lico ka buñata litisizwe kwanu kukala fo lutezi kwanu. Mi kuzwa ku musala ka ni Na, ni lubasi lwa ka, kaniti lwa itumela ka zona. Fokuñwi Na libalanga nihaiba ku bulela sika ka sona. Ki kupateha maswe, mwa ziba. Muhipulo wa ka umwa kupateha koku cwalo nako kaufela. Mwa kona ku nahanezea mo ku inezi, ka batu, isi fela ba bazwa kwanu kwa keleke ye, kono ni ba bazwa mwahala lifasi kamukana. Mwabona? Mi li ni beyanga mwa buino bwa kupateha luli ka nako kaufela.

⁷ Yomuñwi na bulela ka za kuneela limbututu, ni lisebelezo za kolobezo, ni zeñwi cwalo. Zani ki zende luli. Kambe Ne ni ka eza cwalo, kono fela li kumbani hahulu, Hanina—Hanina nako ni hanyinyani. Ni lukela kubeya muhipulo waka ku se, ona Liñusa le. Mwa ziba Bibele ne iize kwa ba apositola, kamba . . . Ba apositola, nitaluse, mwa Bibele, ne baize, “Muye, mu yo bata, mwahala mina, baana ba libubo lelinde, mi baba sepahala mi ba batezi Moya o Kenile, kuli ba kone ku talimana ni litaba zeñwi.” Mi Ni bulelezi Billy . . .

Na ize, “Muka neela limbututu ka nako ye, tate?”

Se nili, “Oh, mawi!” Mwabona? Haiba . . . Luna ni babañata ba bona baba libelezi ku neelwa, mi yani ki niti, Ni kabe ni kutile kuli ni toba ni lizazi leliñwi la kuneela limbututu. Kacwalo Ni ka tabela kueza cwalo, cwale.

⁸ Kono lu bata ku itumela ka yomuñwi ni yomuñwi wa mina kuzwa kwa lipilu zaluna; musala ka, Na, ni lubasi lwa luna. Sicaba si lu tisezanga lico za mwa makapa, manawa akopani ni bata, mahapu, mawakaka, oh, bicamu. Sika kaufela sene ba kona ku nahana, ba sitisa.

⁹ Muzwale yomunde ni kezeli, ka zazi leliñwi, neba lu tiselize nyunywani tuna ya ngangalukunyi. Ni sa lica ni cwale. Mi kacwalo fela . . . Oh, mi Ni ka lukela kuli ni ifeze Ni si ka ya kale, Na sepa. Kacwalo haiba ha Ni ifezi, uka i lwala ha luya. Mi kacwalo—kacwalo lu ka . . . Kaniti lu itumezi ka lika ze. Ni ziba batu babañata hahulu; babañwi ba bona ha Ni ba zibi. Ne ba lobala fa munyako ha lukena. Mi kacwalo Na itumela ka zona.

Mi Ni kupa kuziba. Ni na... Ni boni babañata, mi kuba ni babañata bao Ni sa bonangi. Ni—Ni ziba kuli mutu kaufela wa utwisisa kuli Ni—Ni bata kufita ku mutu kaufela haiba Ni kona, kono Ni inzi fela ni nosi. Mwabona? Ku... Hanikoni kufita ku mutu kaufela. Ni eza lika kaufela ze Ni ziba mwa ku li ezeza.

¹⁰ Kacwalo, Mulimu abe ni mina. Ni sepa kuli kuna ni Alimuñwi yaka ba ni mina; yani ki Jesu Kreste, mi Wa kona kuba yena. Ki yena fela Mutu anosi ya mata kaufela. Mi Yena ki ya liteni kaufela, kacwalo Wa kona kutusa ka mukwa kaufela. Mi, wa ziba lika kaufela, mi hape wa ziba ni kutokwa kwa mina, ka ze mu tokwa kaufela.

¹¹ Ni laela mutu kaufela kuli Hanina... Ni bile ni utwa kapili mo Ni konela, kukala nako ye Ni bile mo kakusasana cwana, mi Ni kanga mutu kaufela ye Ni kona. Mi haiba... Se Ni sina, yena Mulimu ya mata kaufela uka—uka mifa za kutokwa kwa mina kaufela kuya ka bufumu bwa Hae mwa Kenya.

¹² [Muzwale Branham wa yema hanyinyani, mi ubulela ku Muzwale Neville—Mu.] Hanikoni kubala sani hande. Kikuli uka bala nji?

Ki zibiso ya butokwa ka mukwa wa yona. Mi Ni sepa kuli Billy Paul ki yena yana i ñozi. Kakuli uswana sina na; Na hanikoni kubala nihaiba muñolo waka luli. Mi kacwalo Ni na ni muñolo wa ka ni nosi. Mi kambe ne mu ka bona zeñwi ze ñozwi fa, ze ni ñozi fa, munahana kuli mwakona ku li utwisisa nji? [Muzwale Branham ubonisa pampili ya hae kwa puteho, mi wa seha ni bona—Mu.] Ni na ni muñolo oswana inge naleli, yesila mutano, ni zeñwi cwalo, ona cwalo fela...

[Muzwale Neville ubala taba ye ñozwi—Mu.]

Muzwale Adaïr, Adaïr wa kwa Arkansas, ulukela kubona Rev. Pearry Green kwa mulaho wa keleke ona fa. Ku lukile.

¹³ Cwale, kacwalo taba yeñwi ye Ni lukela—ye ni lukela ku zibahaza fa ki—ki kuli, busihu bwa kacenu cwale kwa sebelezo ya foliso. Lu ka lapelela bakuli busihu bwa kacenu, mi kacwalo Ni—Ni sepa kuli mu ka ba kwanu.

¹⁴ Mi lu luma litumeliso kwa sicaba kaufela mwahala naha kaufela, ka Libizo la Mulena Jesu, kuli Mulimu ami fuyole kakusasana cwana. Babañwi ba ku mina seli musihali tuna. Kafo mwa New York, se i bata kuba musihali tuna. Mi ni kafo kwa Arizona, kwa Likamba la Wiko, seli bukaufi ni sebene kiloko. Kacwalo kuna ni... Mi kwanu lu inzi mwahali. Kacwalo Mulimu ami fuyole ha munze mu teezeza. Cwale se sikona kuba...

Ni nani sona fa pilu yaka, halunze lu li kwanu...

¹⁵ Mi ne ni sika lumelezwa kuba ni miyaho, mi mafelelezo ki ha ba ni fa tukuluho; nelu kaba ni sebelezo iliñwi, kono ha lu lukeli ku lapelela bakuli kaufela. Na—Na ha ni... Bwani ki bulumiwa bwaka. Ni lukela kueza seo Moya o Kenile uni bulelela kueza.

Kacwalo Ni—Ni hanile, kakuli Ni bata kuba ni tukuluho ya kueza kaufela seo Moya o Kenile ubulela kuli ni eze. Mwabona? Kacwalo Ni hupuzi kuli lwa kona fela ku libelela lizazi lililiñwi hape, nihakulicwalo, mwa tabernakele. Mi ku batile kakusasana cwana. Mulena ulu ezelize fela lizazi lelinde, kacwalo lu itumezi.

¹⁶ Cwale, ka kueza cwalo, Ni tile kwanu ka libaka la kuluta Manaka a mafelelezo, Manaka Asupa a mafelelezo, ni Litolombita Zesupa za mafelelezo, ni Mishika Yesupa ya mafelelezo, ya Buka ya Sinulo, ku litamelela hamoho mwa hola ye lupila ku yona ye cwale; ku latelela kukwalula kwa Maswayo Asupa, Linako za Likeleke Zesupa. Kacwalo, haluna sibaka sa kueza sani. Kacwalo Ni—Ni sepa kuli, kapili mo Ni konela, lu ka...kona kuba ni sibaka sesituna ka zani, ikona kuba kwanu kamba mwa Louisville, New Albany, kamba nihaiba kubapula tende, kacwalo lukona fela kuina kuya fela ka mo Mulena alu etelela ku ezeza.

¹⁷ Kono ku se cwale, Ni ngile kolo ye ya ku bulela kwa sicaba ku lumela kwaka ni tumelo yaka ku Mulimu, mi hape ni ku mitisa kwa hola ye lupila ku yona. Mi ka se, ha ku si ka tomelwa mutu yomuñwi, lituto za litumelo, seo kaufela sikona kuba sona; kuswana fela sina mo Ni bonela Linzwi la Mulimu. Mi Sunda ye felile ne luna ni kusuluha kokunde kwa Moya fahalimwa Linzwi. Neli yetelele hahulu, mi Ne ni sa tabeli kuina nako yetelele yani; kono ibo halu zibi nako ye lu ka kopana ka nako ya mafelelezo. Mi lu lukela, sina...lu bata kuba. Ni bata kuba, nitaluse, sina Paulusi wa kale, “Hani si ka swabela ku mi zibisa Litaelo kaufela za Mulimu.” Jesu naize kuli Na si ka patela balutiwa ba Hae sesiñwi.

Mi sina Na, ni patehile hahulu kulika kuina mwatasa tozo ya Moya o Kenile, ni kufumana seo—seo hola, Liñusa la hola seo lili sona, Na mane fokuñwi na palelwanga ku zwela kwande ni ku yo eza misebezi ya ka sina mutanga wa Kreste, kakuba mukutazi. Kono Ni na ni baana babañata nyana baba lika kueza cwalo ka ku ni tusa, ili seo Ni itumela ka sona, mizwale baka ba bakutazi kaufela.

¹⁸ Cwale, Ha ni talusi kulika kubuluka sicaba. Haiba mina, kwande kafo mwa naha ko kuya Liñusa, mwakona kuyema ni kutalima keleke ye kakusasana cwana, mwahala lipula, mwa sibaka sa banana, fande, lylimba ze lila, mwa limbasi, likocikala, ni zeñwi cwalo, ni limota, ne mu ka bona seo butata buli sona. Mi he sebelezo ifi ni ifi, buñata, ñata ba koboca; ni kubiza, ni zeñwi cwalo, bapalelwaga kukena mwahali kamba kuba bukaufi. Mi lutokwa sibaka sesituna kuli batu baine mi ba katuluhe.

Mi halu taha kwa neku la kutisa—kutisa Liñusa leo Ni nahana kuli ki la butokwa hahulu luli, Ni ikutwa kuli lu lukela kuli, mutu ni mutu, a katuluhe mi aine, mi kacwalo lwa kona ku teezeza; ni lipotoloto zaluna ni mapampili, ni za kuñola ni

Bibele, ni zeñwi cwalo, lunze lu—lu ñola litaba. Kono ka mukwa wo Ni hupuzi kuli Ni kutele kwa nako ye lu nani, ye lupila ku yona, ni kulika kutisa zeñwi za lika ze mu ka katana ze. Mi mu ka litokwa.

¹⁹ Haiba Ni taha kwanu kacenu, kamba lizazi lisili kaufela, kamba mukutazi yomuñwi kaufela, kulika kutisa liñusa kwa sicaba, batu baba shwa sina mo lu inezi, mi ni nako inze i sutelezi hahulu fakaufi, sina ha Ni lumela ka lizazi le; Ne ni kaba muipi ka kulika kutisa sesiñwi se Ni ziba kuli ne si ka mi tabisa kono si lwanisa Linzwi la Mulimu, kamba sesiñwi sa kubiza nyangela, kamba—kamba sesiñwi sesi cwalo; Hani—Hani lukeli cwalo. . . . Hani lukeli kuba seo Ni—Ni bezi fa, mukutazi wa Kreste. Ni bata kutisa sika se Ni ziba kuli ki sa butokwa ku mina, isiñi fela ku boniwa; kono ku nahana kuli ki sika sakuli haiba Ni shwa kacenu, kamuso si ka siyala si lamatezi mwa lipilu za mina kuli si zwelepili sinze si sebeleza Mulimu.

²⁰ Cwale Ni bata kubulela kuli ku nani sesiñwi se si libelezi ku ezahala. Na ziba cwalo. Buñata bwa mina kwanu mwa hupula fani Muzwale Junior Jackson hana tile kuna lusika ya kale kwa Arizona, ka tolo yana bile ni yona. Taba yanca! Ki babakai baba hupula taba yani? [Puteho ili, “Amen.”—Mu.] Mi Mulena nalufile toloko, mi ya to ezahala ka mo ne i bulelezwi. Cwale, ubile hape ni tolo yeñwi, cwalo.

²¹ Mi taba ye nca, muuna kwanu zazi leliñwi, kuzwa kwa Oregon. Yena mane ha ni zibi, mi na . . . lolile tolo yeswana ka za, yona yana lolile Junior Jackson, mi—mi taha ato ni bulelela. Ni—Ni na hanizibi toloko ye yona; Ni libelezi Mulena. Kono Ni ziba kuli ikaba taba yeñwi yezwa ku Mulimu. Muhupule fela cwalo. Kakuli KISONSA SA BULELA MULENA. Ki taba yezwa ku Mulimu. Na hanizibi kuli ki sikamañi. Luli sa sabisa, kusabisa luli! Kaniti, kuya ka—ka litolo zepeli zeo baana bababeli. . . Alimuñwi wa bona Ni sepa. . . ulukela kuba wa Baptist, Presbyterian. Hakulata—hakulata mwendi uteni mwahali mo kakusasana cwana. Hani zibi. Na liteni kwanu zazi leliñwi. Na ha ni muzibi muuna yani.

²² Kono na talusize tolo, ni mioko mwa meto a hae. Mi ya mu sabisa. Uzwelela kwa Oregon kwanu, ku to ibulela. Muzwale Jackson ataha ka mukwa oswana, kakusasa cwana. Mutu yomuñwi a sa zibi yomuñwi; yomuñwi, uzwa kwahule ka limaele ze eza lule kuzwa kokuñwi, mi litolo zepeli cwalo za swana fa taba iliñwi fela. Kacwalo Moya o Kenile usweli ku ni patela toloko ya zona. Hanizibi sa ku bulelela muuna yani. Kono Ni ziba kuli Mulimu ulibelezi kupeta taba yeñwi, mi ikaba ye kanya mwa meto aluna.

²³ Cwale, Liñusa kakusasa cwana, Ni bata kubala mwa Buka ya Magalata. Hani kutazi kamba fela. . . . Ki tuto ya sikolo sa la Sunda. Mi cwale, mina baana ni basali baba yemi kwa matuko

a limota, mi yomuñwi abata kuina mwa cincana ni kuinafafasi mwa nako nyana, kamba sesiñwi, cwale, hamuna ku ni bilaeza; mube fela ka likute. Mi haiba boma limbututu, bana ba bona haba lilela sika kamba zeñwi, yomuñwi uka zwa fande mwa sibaka sa banana ili kuli babe ni sibaka sa mbututu yo.

²⁴ Mi cwale hamunge lipotoloto za mina, Bibebe, ni ku itukisa kuñola Mañolo nyana o luka bala. Hani tabeli kuli muikutwa ku tameha. Ni bata kuli muikutwe—Ni bata kuli muikutwe ku lukuluha kuina ni kubala. Mi hakulata hamuna ku lumela, yeli taba yende. Kono Ni bulela fela se ni kwa buse bwa linaha kakusasana cwana, ili kuli sicaba se si lumezi Liñusa leo Mulena Jesu ani file mwa hola ye, si kone kuziba se si ezahala, ni ku si toma mwa Mañolo.

²⁵ Sunda yefelile ne lu bulezi fa *Batoziwa Mwa Lizazi La Mafelelezo*. Mi haiba mina, ufi kaufela wa mina, mu bateeze ba matepu, mubone kuli mwaba ni tepu yani. Isi kuli lu bata ku lekissa matepu; wani haki ona mulelo. Mulelo ki wa ku hasanya Liñusa. Mwabona? Mwabona? Haiba mu na ni mushini wa matepu, mukopanye batu hamoho, mi mu ilize, ni kuteeleza hande. “Batoziwa.”

²⁶ Mu utwa batu haba nanuha ni kubulela kuli, “Oh, Bibebe i bulezi kuli, ‘Mazazi a maungulo, bapolofita ba buhata baka taha mi baeze ze komokisa ze.’” Ani kona Mañolo kaniti. Konakuli sani si tamahana ni sikamañi? Si lukela ku tamahana hande.

Busihu bwa kacenu Ni bata kubulela fa, haiba Mulena alata, fa: *Mulimu Kupatuluha Mwa Linzwi La Hae Tota*, kuli mane liito ha likoni kutaha fo ku lukela kuba zebe. Mwabona? Kuswana fela sina kuñola Bibebe kaufela, mi, mwahala Bibebe kaufela, maswaniso a Jesu Kreste. Kacwalo Ni bata ku ambola ka sani busihu bwa kacenu, haiba Mulena alata. Mi cwale, haiba kupala, ikaba zazi lisili.

²⁷ Cwale mwa Buka ya Magalata. Ni mwa Buka ya Makorinte ba Bubeli 4:1 kuya fa 6, ni Magalata 1:1 kuya fa 4, Ni bata kubala Mañolo nyana. Cwale mwa Magalata 1:1 kuya fa 4, “Paulusi, muapositola,” mulemuhe kuyema kapili. *Muapositola* italusa “ya lumilwe,” kamba, “mu lumiwa.”

Paulusi, muapositola, (isi ka batu, kamba ka mutu, kono . . . Jesu Kreste, ni Mulimu Ndate, ya mu zusize kwa bafu;)

Ni bana bahesu kaufela babali ni na, kwa likeleke zeli kwa Magalata:

Sishemo si be ni mina ni kozo kuzwa ku Mulimu Ndata luna, ni ku Mulena Jesu Kreste,

Yana itobohile ka libi za luna, kuli alu lamulele kwa bumaswe bwa lifasi la kacenu, kuya ka tato ya Mulimu . . . Ndata luna:

Ku be kanya kamita ni mita. Amen.

²⁸ Cwale mwa Buka ya Makorinte ba Bubeli, kauhanyo yabu 4, mi luka bala kuzwa fa 1 kuisa fa timana, yabu 6.

Hakuba cwalo ka kubona kuli luna ni sebelezo ye, sina ha lu amuhezi sishemo, ha lu fokoli;

Kono lu tuhezi linto ze patwa ili ze swabisa, halu zamayi ka mano a maswe, ha lu swalilinzwi la Mulimu ka buhata; kono ka ku bonahaza niti lu i paka hande kwa lizwalo la mutu ni mutu fa pila Mulimu.

Kono haiba evangeli ya luna i kwahezwi, i kwahalezwi baba shwa:

Haiba nji taba yeo haitisi ku lemuhiwa kale, Hani zibi se si ka kondisa.

Ili baba sa lumeli bao mulimu wa lifasi le ufoufalize kutwisiso ya bona, kuli basike ba bonisezwa liseli la evangeli ya kanya ya Kreste, ye li siswaniso sa Mulimu, kuli li ba monyehele.

Kwa swana sina mone kubezi mwa simu ya Edeni, “Kuba zusa mwateni, ba ka suhana ba swala kwa Kota.”

Kakuli halu buleli za luna bañi, kono ki za Kreste Jesu ye li Mulena; . . . luna lu batanga ka kulata kwa Kreste.

Kakuli Mulimu, yana laezi kuli liseli libenye mwa lififi, u monyehile mwa lipilu zaluna, ni kufa liseli la ku ziba kanya ya Mulimu fa pila Jesu Kreste.

²⁹ Amen! Ki Linzwi leli balilwe leo! Cwale, toho ya taba yaka kakusasana cwana, ki: *Mulimu Wa Lusika Lolu Maswe Lo.* Sina halu balile mwa Mañolo, “mulimu wa lifasi le, ona lusika lo lu maswe lo.” Cwale, Liñusa le li supa bumaswe bwa lusika lolu maswe lo, mi kwa lukela ku polofitela lusika lolu maswe lo.

Mi ki tumelo yaka kuli kaufela . . . kuli Bibebe ina ni kalabo mwa lusika kaufela, ye ñozwi kale mwa Bibebe, ka mulumeli wa lusika lwani. Ni lumela kuli lika kaufela ze lutokwa li ñozwi ona mwahali *Mo*, litokwa fela kutolokiwa ka Moya o Kenile. Hani lumeli kuli mutu kaufela mwa lifasi una ni tukelo ya kubeya toloko ya hae fa Linzwi. Mulimu hatokwi kuli mutu atoloke Linzwi la Hae. Yena ki mutoloki Iliyena. Na bulezi kuli Uka eza cwalo, mi Wa eza ona cwalo.

³⁰ Sina ha Ni bulezi linako zeñata. Na ize, “Mwalyanjo uka itwala,” Na bulezi sani ka milomo ya mupolofita, mi ki ha itwala. Hakuna mutu ya lukela ku toloka sani. Kwa simuluho, Na ize, “Ha ku be liseli,” mi la ba teni. Hakuna mutu ya lukela ku toloka Sani. Na ize kuli, “Mwa mazazi a maungulo, Uka sulula kwa Moya wa Hae fahalimwa libupiwa kaufela,” mi Na ezize. Ha litokwi ku Li toloka ni hanyinyani. Ha ize kuli, “Mwa mazazi a maungulo, lika ze” (ze lubona ha liezahala cwale) “likaba teni

fa.” Ha si tokwi kutolokiwa ni hanyinyani. Si tolokilwe kale. Mwabona?

³¹ Cwale, mulemuhe hande halunze lu bala Linzwi. *Mulimu Wa Lusika Lolu Maswe Lo*, mo lupila cwale. Ikona ku bonahala yenca, ki taba yenca luli, mwa lusika lwa muhau lo, foo, “Mulimu asweli kubiza sicaba sa Libizo la Hae,” yani ki Munyaliwa wa Hae, mwa lusika lolu maswe lolu lukela kubizwa bumaswe lo. Ona lusika lo “Mulimu asweli kubiza sicaba sa Libizo la Hae,” ka sishemo, kuli sizwe, mi lu bizwa kuli lusika lo lu maswe. Cwale, lu paka ka Bibele kuli lo ki lusika lwa Na bulela ka lona. Ki taba yenca luli ku nahana kuli, mwa lusika lolu maswe sina cwana, kuli mane Mulimu na ka biza Munyaliwa wa Hae.

³² Mu lemuhe, Na ize kuli, “sicaba,” isiñi “keleke.” Kiñi? Ibo, Ibizwa Keleke, kono Na ka biza “sicaba.” Cwale, keleke ki nyangela ya batu babañata ba mifuta ye shutani. Kono Mulimu usweli kubiza yeñwi fa... Na sika bulela kuli, “Ni ka biza ba Methodist, Baptist, Pentekota.” Na bulezi kuli Uka biza sicaba. Kuba bizeza sikamañi? Libizo la Hae. Mwabona, sicaba; alimuñwi kuzwa ku ba Methodist, yomuñwi ku ba Baptist, yomuñwi ku ba Lutheran, ni yomuñwi kuzwa ku ba Katolika. Mwabona?

Kono Usweli wa biza, ha ki sikhata sa keleke, kono “ki sicaba sa Libizo la Hae,” se si amuhela Libizo la Hae, li tamahani mwa Libizo la Hae, siya kwa sinawenga ku yo nyalwa ku Yena, kuba siemba sa Hae, mwabona, ka ku lemuhiwa kale. Kuswana fela sina muuna ya keta musali yomunde wa kunyala mwa bupilo, yana lukisizwe kuba siemba sa mubili wa hae. Kacwalo, sani ki kuli, Munyaliwa wa Kreste ukaba cwalo, mi kona mwa inezi ni cwale, kuzwa kwa makalo, utomilwe ki Mulimu kuli abe siemba sa Mubili wani. Mwabona? Oh, Mañolo a fumile luli, atezi linosi!

³³ Mulemuhe, isiñi sa bulezi mutu fela, sa bizize fela mutu; kono ki sa ketile Mulimu kusika ba kale mutomo wa lifasi, mi usweli wa biza mwa mazazi a mafelelezo; isiñi kopano. “Sicaba sa Libizo la Hae.” Mi lusika lolu maswe lo kona Ha ezize cwalo, ona lusika lwa bupumi lo.

³⁴ Biki yefelile, mwa Mateu 24, neli lusika lwa bupumi hahulu mwahala masika kaufela. Masika kaufela a bupumi, kuzwa kwa simu ya Edeni, kutaha ka ku shetumuka cwalo, haku si kaba kale lusika lwa bupumi cwalo sina lusika lo. “Bapolofita ba buhata baka taha mi ba bonise limakazo ni ze komokisa, haiba ku konahala baka puma ba Babaketilwe.” Mwabona? Cwale, ki likeleke ze bata, fela za sihalihali, ze omelezi, ni zeñwi cwalo, lituto za litumelo za ipangezi mutu, zani halina kukona; Babaketilwe habana ku teezeza ku ze cwalo. Kono liteni fani mane kuswana sina sa niti. Ku siya fela Linzwi lililiñwi kona ze mu lukela kueza. Ze sepiselizwe lusika lo; ki nako yetuna luli!

Bakreste, kai ni kai, mu tokomele hola ye lupila ku yona! Muñole zeo, mi mubale, ni kuteeleza ka tokomelo.

³⁵ Ki sikamañi sana ka bibeza sicaba sani Mulimu mwa lusika lo, kwa Libizo la Hae? Libaka lateni, ki ku Mu lika, Munyaliwa wa Hae. Ki kwa . . . Ha Ka bonahala, ulikilwe kale, u pakilwe, upakilwe ku Satani. Sina mone ku inezi kwa simuluhu, kona mo ku ka bela kwa mafelelezo.

³⁶ Sina peu mo ikalelanga mwa mubu, i taha mwahala makapi, bupilo bwa yona, kono i fela ka mukwa wa kuba peu yeswana sina mo ne ikenezi mwa mubu.

Mi ka mukwa oswana o peu ya bupumi neiwezi mwa mubu, mwa Edeni, kona mukwa oswana o i fela ka ona mwa mazazi a maungulo.

Kuswana fela sina Evangelii hane iwezi mwa kopano kwa Nicaea, Rome, i fela ka kopano yetezi.

Ona cwalo fela siina Peu ya Keleke hane iwile kwa mulaho kwani, ni lisupo, limakazo, ni Kreste yapila mwahala bona, i felela mwa mazazi a maungulo mwatasa bulumiwa bwa Malaki 4, ni ku kutisa hape Tumelo yapili yene kile ya fiwa sapili.

³⁷ Lu fumana cwale, lusika lolu maswe lo ki kupaka, ku Satani, Musali yo haswani sina Eva, Ha ki wa mufuta wa musali yani. Mi Uka likiwa ka Linzwi la Hae, Munyaliwa, sina munyaliwa wa Adama hana likilwe ka Linzwi. Mi munyaliwa wa Adama na lumezi siemba kaufela sa Linzwi, kaufela, kono a lyangana ka sepiro iliñwi, yakuli, "Wa swana maabani, kacenu, ni kuyakuile," kacenu, mwabona; kono apalelwa ka sepiro iliñwi, mwatasa muliko wa sila, pata ni pata. Mi cwale, sicaba sesi bizwa ka Libizo la Hae, ka niti, kona Munyaliwa wa Hae. Ulukela kutaha mwa swalisano hape ni sika se siswana; isiñi fela ka niti ya likopano, kono Linzwi kaufela!

³⁸ Kakuli, kwa simuluhu ya Bibele, mutu na filwe Linzwi la Mulimu kuli apile ka lona. Linzwi lililiñwi, la tolokwa ka mafosisa ki-ki mutu yabizwa Satani, mwa sibupeho sa mutu yabizwa noha. Satani, ku mutu yo, na bulezi ku Eva, mi a toloka Linzwi ku yena ka mafosisa, mi a lateha. Mwabona, Li lukela kuba Linzwi kaufela.

³⁹ Mwahala Bibele, Jesu ataha mi ali, "Mutu hana kupila ka buhobe fela, kono ka Linzwi kaufela," fani ha Na likilwe ki Satani.

Cwale, Mulimu wa lubulela fa kuli mwa mazazi a maungulo, kuli, "Uli mulimu wa lifasi le uka nanuha mwa mazazi a maungulo."

"Mi yo kaufela ya ka ekeza linzwi lililiñwi ku Lona, kamba kunga Linzwi leliñwi ku Lona, siemba sa hae si ka zusiwa mwa Buka ya Bupilo."

Mulimu alu utwele butuku! Mi lusike lwa zamaya sina lihembe ze inuneka, lifuba za li ku zwela fande, toho inangukezi mwa halimu, bu caziba bwa lika kaufela, kakuli ni luna ka nako yeñwi neluli baba sa utwi. Ha luyenji ka muhau, ni makeke, ni ku ikutwa mwa lipilu zaluna kusutelela ku Mulimu, lutahe ka buikokobezo kwa Lubona lwa muhau.

⁴⁰ Ki taba yenza cwale, kasamulaho wa lilimo ze mianda ye naintini za kukuta za Evangel, mi cwale ki yo, wani ki mulao wa lifasi, kuna ni bumaswe hahulu kufita mwa mazazi ani, ha Na li fa. Mulao wa lifasi soli o maswe hahulu. Lifasi liya kwa kuba mayemo amatuna hahulu. Mwa ziba cwalo. Mulena usweli kutaleleza Linzwi la Hae kwa maneku kaufela.

⁴¹ Maabani, inze ni yemi... Ni sepa kuli mucaha ha si ka... Hana kuba cwalo. Ne ni tile ni musala ka, ni musala Bo. Wood, Muzwale Roy Roberson, fokuñwi uteni mwahali mo, Muzwale Wood, ne lu yemi nyana fa Benkele ya Sintolo sa Youngstown, kuli lunge—lunge sibyana sana na ni Kezeli Wood. Mi kwa... hane lu sa yemi kwani, mucaha yomunyinyani ataha mi ato itibahaza, mi nali muenyi ku na. Mutangana yomuñwi ataha mi ali ne ba zwa kwa Alabama, Georg... Na sepa neli Georgia, kakuli Ne ni ba buzize haiba ne ba ziba Muzwale Welch Evans. Mi lwa be lwa ambola mizuzu nyana. Mi hane Nili ni zamaye, mutangana yo ato ni talima. Mucaha yomuñwi ni mushimani wa hae inze baya, mutangana yo a to ni talima. Ki hali, “Ki taba fela iliñwi ye Ni bata kubulela.”

Se nili, “Kana—kana u mulumeli nji? Kana u Mukreste nji?”

Ali, “Batili, sha.” Ki hali, “Ni bile...”

⁴² Mwendi Hanina kubulela hande kaufela manzwi ha na bulezi fa, kono mwendi nabile ya sa lumeli hanyinyani. Ne ni mu buzize litaba za Lingeloi la Mulena hane libonahalile. Mi ali na utwile ka zona, kono ali kuba abe mwa keleke ni haisali, keleke ye. Se nili, “Kikuli wa Li lumela?”

Ali, “Eeni, sha.” Ki hali, “Ni—Ni bile ni talima taba yeñwi.” Ali, “Batu babile ba ni bulelela ka litaba za ku akaleza ze ni zeñwi, mi Ni utwile ni fa tepu no akaleza kuli California ika pazuha ku ikaba cwalo.” Mi ali, “Hane Ni boni sani mwa mutende, se Ni lumela.” Ki hali, “Na taha kacenu kamba kamuso,” fani ki kacenu, “ka nako yaka yapili.”

Se nili, “Mulena aku fuyole, mushimani,” mi na kala ku nyanganyisa lizoho la hae.

Ki hali, “Kono Ni bata kubulela taba yeñwi ku mina, sha.” Ki hali, “Ni latehile sina kulateha mo kukona kubela.” Ki hali, “Ni swana sina sheleñji ya muwayawayaya ye latehile mwa libunda la mushabati, kulateha!”

⁴³ Se nili, “Kono ha ulukeli kupila cwalo. Kuna ni Yomuñwi ya yemi ona fa Ya kona kuku fumana ka muzuzu o lukela ku fumanwa.”

Ki hali, “Ni itukisize.”

Se nili, “Kana wa kona ku inamisa toho ya hao?”

Mi ali, “Ha ni swabi.”

Isiñi sani fela, kono a kubama ka mañwele a hae, ona kwani ko ne lu yemiselize mota, fa pila sicaba kaufela. Batu mwa nzila banze ba mu talimela. Ona fani se lu lapela ni yena, kufitela afa Mulimu pilu ya hae. Na tile, ali mueza libi; ayo kuta, nali mwana Mulimu. Na zamaya kwa tuko a mota, ali ya shwile; mi a kuta, aba yapila.

⁴⁴ Se nili, “Siliba si ka kwaluha kamuso.”

Kuna ni siliba se si tezi Mali,
 Azwa mwa misinga ya Emanuele,
 Mi baezalibi haba nwela mwateni,
 Ba tamululwa libi za bona kaufela.

Se nili, “Nanuha mi ukolobezwe ka Libizo la Jesu Kreste, ubize fa Libizo la Mulena. Mulimu uka kutaza ka Moya o Kenile, ni ku kufa lika zetuna ze, ni kuku eza kuli u Li bone.”

⁴⁵ Ki sikamañi sani? Lifasi lizamaya li pahama. Kiñi? Moya wa kutokwa buiswalo, ku sa ipuluka, bulapeli bwa sayansi, bu kenyize lika zani mwa “siteo sa linyunywani kaufela ze maswe ni ze masila,” sina Bibele ha i bulezi. Halu baleni fateni, Sinulo 18. Halunze lukala fela taba ye, lunge Sinulo 18:1 kuisa fa 5. Na sepa Ni i ñozi ka swanelo.

Mi haku felile zeo Na bona lingeloi leliñwi leli zwa kwa lihalimu, lina ni mata amatuna; mi lifasi ne li benya ka kanya ya lona.

Mi la huwa ka mata a linzwi leli tiile, (cwale mina batu bene bana ni litolo) . . . kuli, Babilona yomutuna u wile, u wile, ufetuhile munzi wa mioya ye maswe, ni tolongo ya mioya ye masila kaufela, . . . tolongo ya linyunywani ze masila kaufela ze ileha.

Kakuli macaba kamukana a nwile kwa buhali bwa veine ya buhule bwa hae (keleke), mi malena a lifasi ba ezize buhule ni yena, mi balekisi ba lifasi ba fumisizwe ki butuna bwa bumaswe bwa bupilo bwa hae.

Mi Na utwa linzwi lisili leli zwa kwa lihalimu, le li li, A mu zwe ku yena, mina sicaba sa ka, kuli musike mwa ba ni taba ni libi za hae, . . . mi mwa amuhela kwa likozi za hae.

Kakuli libi za hae li kolohani kuyofita kwa lihalimu, mi Mulimu uhupuzi ze maswe za hae.

⁴⁶ Ki mamela yecwani! Ye nepela keleke hande kukuta mwa Sinulo 3:14, kwa lusika lwa Laodesia, mutakafululele; ba bulapeli maswe, kono ba mutakafululele. “Wena, kakuli wena ubulela kuli, ‘Lu fumile, hanina se ni tokwa,’ kanti ha u zibi kuli uinzi mapunu, unyandile, ushwile meto, mi ha u zibi.” Ka swanelo li zamaelela ni Mañolo a lusika lo, isiñi Mañolo a lusika lwa Daniele, isiñi a bani ba libizo la . . . lusika lwa Nuwe, kono mwa lusika lwa maungulo lo, lusika lolu maswe.

⁴⁷ Mulemuhe fa, “Wena uinzi mapunu.” Mutuhele seo sinwele hande ka kutunga. Na ziba Na kona kuba ni kusa utwana mwa keleke fa muhupulo wo, kono si fitile fa sibaka fo Mukreste ha zwela fande a ndu ya hae mi utokwa kutiswa fapila bumaswe bwa lusika lolu maswe lo, ka basali baba sa apali hande.

⁴⁸ Basali, Ni ka bulela cwana, mi Ni bata kuli muiteeleze. Mi, baana ni basali, mwakona kuhana taba ye, kono Ni ikutwa kuetelelwa kuli ni ibulele. Kana mwa ziba, musali kaufela ya i tubula sina cwalo ha si ka iketa mwa ngana ya hae? Kana mwa ziba, ha sika iketa, kamba wa lumela cwalo kamba ha lumeli, kamba ha nahani cwalo, ki lihule? Mane musali ni ha ka yema ananuzi lizoho ku Mulimu ni kukonka kuli ali kuba aswalwe ki muuna usili kwanda muuna hae, mi yani ikona kuba niti ye sepahala, kono niteñi usali lihule. Jesu naize, “Yo kaufela ya talima musali ni ku mu lakaza u sa mu bukile kale.” Mi musali wa kona kuba . . .

⁴⁹ Mwabona, u inzi “mapunu,” Bibele i bulezi kuli, “mi ha zibi.” Moya o sweli ku mu toza kuli aeze lika ze cwalo ki o maswe, moya wa buhule. Sibupeho sa hae sa kwande, mubili wa hae wa butu, nama ya hae, wa kona kuba ya kenile. Hakulata hakoni kueza kezo kaufela ya bubuki, mi wa kona kukonka Mulimu mi ikona kuba niti, kuli ali kuba, kono moya wa hae ki moya wa lihule. Ufoufalizwe hahulu ki mulimu wa lifasi la mitinelo; u apezi fela ka butanya ni ku zwela kwande kwani.

⁵⁰ Ka zazi leliñwi, Muzwale Wood ni Na ne lu beile mukolo wa luna mwa nuka. Ne ni lukela ku zwela fande ka mizuzu fela, kuli luye kwa nuka. Mi kaufela ko mukona kuya, basali ni sishañata nyana sa . . . ze bizwa tulukwe kamba sesiñwi, mwahala bona. Ani ki maswabiswa. Musali hakoni kuba mwa buiketo bwa ngana ya hae mi aapale se si cwalo. Una ni moya wa buhule. Cwale, mu kondise zani ni Mulimu, kalibe, kakuli mu ka fumana ka zazi leliñwi kuli yani ki Niti.

⁵¹ Kana ukona cwani, kalibe, ka kuziba mubili wa hao mo ubezi wa butokwa, ni ku bonahalisa kwande cwalo ku bo diabulosi ba litakazo ba, bo diabulosi ba sibi baba yembana mwa mikwakwa ya kacenu? Kambe bana ba bashimani ba Mulimu neba kaba bana ba Mulimu ba bashimani, muuna hao nali mwana Mulimu wa mushimani, na ka tabela kuli aku tinise liapalo kamba a ku

siye. Kambe mushimani na kaba mwana Mulimu wa mushimani, na si ke kunyala nto ye cwalo. Mwabona?

Mu li, "Usweli ku- . ." Batili.

Ni mi bulelala za Niti, mi zazi leliñwi mu ka Li katana. "Mapunu, buhule; mi ha zibi."

⁵² "Oh, Ni konka kuli ha Ni koni ku keluha kwa buitamo bwa bo muuna ka." Muuna hao uka ku atulela zona ha no ka eza cwalo. Kono Mulimu uka ku atula kuya ka mufuta wa moyo ona ni ku wena; isiñi ku kuatula ka mubili wa hao, kono ka moyo wa hao, mutu wa mwahali yani.

⁵³ Mutu wa kwande ki sibupeho sa mubili se si zamaiswa ka maikuto a silezi...kamba a ketalizoho, nitaluse. Mutu wa mwahali ki mutu wa moyo ya zamaiswa ka maikuto a ketalizoho; lizwalo, ni lilato, ni zeñwi cwalo. Mutu wa kwande; kubona, kulwaza, kuswala, kununkelela, kuutwa.

Kono mwahali a zani kuna ni moyo, mi uzamaiswa ka nto iliñwi, tato ya mina ya ku lukuluha. Mwa kona kuamuhela sa bulela diabolosi kamba mu ka amuhela sa bulela Mulimu. Mi sani si ka paka mufuta wa moyo oli mwahali mwani. Haiba ki Moya wa Mulimu, Uka fepa fa lika za Mulimu, mi Ha una kufepa fa sika kaufela sa lifasi. Jesu nabulezi kuli, "Haiba mu lata lifasi kamba lika za lifasi, konakuli lilato la Mulimu hali sika kena kale mwa siemba sa mwahali mwani." Satani u ku pumile. "Mutu hana kupila buhobe fela, kono ka Linzwi kaufela le li zwelela mwa mulomo wa Mulimu."

Mulemuhe cwale, lu fumana kuli uinzi "mapunu," kulakazisa mi uinzi njenje.

⁵⁴ Mi lifasi libonahala kuba mwa lusika lolu maswe ni kufita masika kaufela akile aba teni. Kwali kuba mwa lusika kaufela kube basali babakile ba eza ze cwalo, ha kusika ba kale konji bukaufi ni nako ya sinyeho ya muunda ya lifasi. Mi Jesu na swanisisa ku lona. Luka fita ku zani hasamulaho wa nako.

⁵⁵ Kana Mulimu ulatehezwi ki buiswalo, kamba kikuli Usweli ku lumeleza kezo yeñwi kuli i zamaise nji? Hani zibi. Kalabo ya niti kwa puzo ye kikuli, kwa munahano wa ka, kuna ni miyoa yemibeli ye sweli ku kangisana mwa lifasi kacenu, ye sweli kubeleka. Cwale, haku konahali kuba zeñwi hape kwanda zepeli, litoho zepeli. Mi Yeñwi ya zona ki Moya o Kenile oswel i kubeleka; omuñwi ki moyo wa diabolosi, mi, mwa mazazi a mafelelezo a, mwa bupumi.

Cwale Ni ka beya muhupulo waka ona fa mwahala taba yaka ye siyezi, ze siyezi ya . . . Liñusa la luna.

⁵⁶ Miyoa ye mibeli. Omuñwi wa yona, ki Moya o Kenile wa Mulimu luli; haili omuñwi, ki moyo wa diabolosi, o sweli kubeleka ka bupumi. Batu ba lifasi ba sweli kuba ni keto ya bona.

Moya o Kenile fa usweli kubiza Munyaliwa wa Kreste. Usweli kueza cwalo ka ku bonahaza Linzwi la Hae la sepiso ku Yena, kwa lusika lo, ku bonisa kuli Ki Kreste.

Haiba munwana ulukela kushenya mwa lusika lo, munwana uka shenya. Haiba nji liutu lilukela kushenya mwa lusika lo, liutu lika shenya. Haiba liito li lukela kubona mwa lusika lo, liito lika bona. Mwabona?

Moya wa Mulimu, sina Haunzo hula kutaha mwa sibupeho se si petehile sa Mulimu, kona lusika lo lupila ku lona. Moya o Kenile uteni mo kwa ku bonahaza Liñusa la hola ye. Mi Moya o Kenile usweli kupeta se, ili kuli sicaba si lumele kuli Mulimu uka bizwa mwahala kulyangana kwa.

Moya wa diabulosi o sika kena uteni fa kubiza keleke ya hae ka mafosisa, sina kamita, ka kulyanganisa Linzwi la Mulimu, sina mwana ezelize kwa simuluhö. Mwabona lisweli kutaha kukutela kwa nako ya peu yani hape, kuzwa kwa Edeni? Ki le fa hape.

⁵⁷ Cwale, kwa mulaho kwani, mu ba siemba-...sa masika asili, nemuli ba likopano, nemuli ba *se*, *sani*, kamba *sesiñwi*. Ki sikamañi sene siezahalile kwa lutaka lwa likopano? Ne lu omelezi. Moya osweli kuzwelapili ni kuikela, mi Li felela mwa Peu. Mwa bona?

⁵⁸ Mi muliko, wa zepeli cwalo, ukutela kwani kwa lika zeswana ka mo ne libezi kwa simuluhö. Mulemuhe. Musike—musike, batili, musike mwa libala zani cwale.

Sina Joani, Joani wa Pili 4:5 ni 6, haiba mu bata kubeya san mwa libuka, u si biza kuli, “ki moya wa mafosisa.”

Eva na si ka zwela fande, ka kulata, ali, “Hani lumeli ku Mulimu.” Batili. Neli mafosisa ha na lumezi musali yani.

⁵⁹ Satani na si ka zwela fande ni kubulela kuli, “Oh, kihande, lani mane ha ki Linzwi la Mulimu.” Na lumezi kuli Ne li Linzwi la Mulimu, kono abeya toloko ya hae ku Lona. Ili, Mulimu na ba bulelezi patalaza kuli basike ba eza sani.

Se si eza sikamañi? “Sitisa buhata bo bu tiile, kuli sicaba si lumele buhata, mi si sinyiwe ki bona.” Cwale haiba mubata kubala sani, Matesalonika ba Bubeli 2:11.

⁶⁰ Sina ha Ni bile cwalo, ki Mañolo nyana a inzi fa, mi haluna kukona ku abala kaufela ona. Leliñwi cwale mi leliñwi nako yetatama, Ni ka mifa ona. Sina mo ku bonahalela bunca, kuli mubuze kamba kueza sesiñwi, mi lwa kona ku abeya ni ku mi balela ona kwa—kwa bunde bwa mina.

⁶¹ “Kueza buhata bo butuna,” sina Bibele hane i bulezi kuli kukaba cwalo, Matesalonika ba Bubeli. “Cwale, muuna yo wa sibi na tahanga ku to iponahaza, ni kuina mwa tempele ya Mulimu, kuiponahaza kuli nali Mulimu, ni kueza kuli sicaba si

kene mwa bupumi bo bu tuna, ku lumela buhata; mi, ba lumele zani, ba ka atulwa ka zona.”

Yani ki taba yeswana yana ezize ku Eva. Ku mufa... Nasika—be ku mubulelala kuli Linzwi ne li si ka luka, kono amufa buhata bo butuna, kuli alumele buhata.

⁶² Moya wa bupumi ki wa diabolosi. “Mioya ye lunya ye beleka mwa bana baba ikanyisi.” Kusa utwela sikamañi? Kana bana ba lizazi le ba utwela sikamañi? Sina Eva mwana inezi, kwa simuluhu, ona Linzwi la niti la Mulimu. Yani ki niti. Cwale haiba mubata kuñola sani...

Halu apuleñi ku yona, Maefese 2, fa muzuzu fela, kakuli ku bonahala kuli lu... Ni ka tuhela fa muzuzu fela, haiba ha mu si ka akufa hahulu, mi babañwi ba li balanga ze. Maefese 2:1 kuisa 2.

U zusize ni mina, bane mushwile mwa milatu ni mwa libi za mina:

Ili ze ne myua ka zona mwa linako za kale ka mukwa wa lifasi le, ka mukwa wa mulena muñaa mata a inzi mwa sibaka sa mbyumbyulu, ili moya onzo sebeza mwa bana ba baikanyisa:

⁶³ “Bana ba baikanyisa.” Mi haiba antikreste, kukalela kwani kwa makalelo a kusa utwa, si kaba sikamañi ha si ka fita ku mutu wa antikreste? Mo si ka bela sa bupumi! Kana ikaba bupumi bo butuna cwani kuli yo—yomuhulu atahise kwa lifasi, kufita mwana ya sali yomunyinyani! Mi na ize, “Moya wa—wa bupumi osweli kubeleka mwahala bana ba baikanyisa,” kuikanyisa kwa Linzwi. Mulemuhe. Cwale Ni bata ku tiyela fateni fo ka muzuzu fela, “bana ba baikanyisa,” mwana.

⁶⁴ Kana mu zibile, mina, simuluhu ya mina, Na kona kupaka ka Linzwi la Mulimu ku mina, mutu kaufela mwahali mo, kuli ne mupila ku bo kuku a mina ba kale. Mi bo kuku amina ba kale, ba to mi shetumunela ku bo kuku amina, mi se mu kena ku bo ndata mina, mi ni ku mina. Mwa ziba cwalo?

Bibele i bulezi kuli, Na sepa ki Maheberu 7, kuli, Melekisedeke, fani Abrahama ha na kutile kwa ku bulaya malena, “Abrahama na lfile Melekisedeke mubingu wa nto iliñwi ku za na hapile.” Mi ki yo Paulusi wa bulela cwale, kuli, “Livi, yana amuhezi sa bulishumi, na sali... Na lfile sa bulishumi, kakuli na sa li mwa teka za Abrahama fani ha kopana ni Melekisedeke.” Kacwalo kaufela sa na ezize Abrahama, konakuli lu fumana kuli Livi na liteni kwani ku Abrahama, yana li yena kuku a hae yomutuna. Abrahama apepa Isaka; Isaka apepa Jakobo; Jakobo apepa ma patriareka, Livi.

Cwale, he, mwa bona, ki se si taha mwa ponahazo ye petehile, ku lemuhija pilis.

⁶⁵ Cwale, mwa Mañusa a, Ni bata ku—ku—ku tiiseza lika ze Ni mi bulelezi mwa Liñusa, kuama Liseli la manzibwana le leo Mulimu nabulezi kuli lika taha mwa lifasi.

⁶⁶ Mi mulemuhe, cwale, “Sibatana se ne sina ni kutaha mwa lifasi, ne si ka puma banī kaufela be mabizo a bona na si ka ñolwa mwa Buka ya Bupilo ya Ngunnyana, ye tabilwe haisamba lifasi litomwa.”

⁶⁷ Mwa munahano wa Mulimu; Mulimu, ona Moya o mutuna. Kwa simuluho, kusika ba kale simuluho, Nali Mulimu, mi kana mwa ziba kuli nemuli ku Yena ka nako yani? Haiba u Mukreste cwale, no li ku Yena ka nako yani.

Mi cwale, haiba sani si cwalo, Toho ya bumulimu kaufela ka mubili i bupehile mwahala Mutu wa Jesu Kreste. Mi cwale Jesu hana shwile fa sifapahano, Ne ni shwile ni Yena, kakuli Ne nili ku Yena ka nako yani; kakuli Na li mutalelēla wa Linzwi, yana iponahaza, ka kuziba kuli ne lu ka to bonahala kasamulaho. Mi neluli fa Kalvari ni Yena. Ne luile mwa libita ni Yena. Mi la zuha ni Yena mwa zuho ya Hae. Mi cwale lu kambamile, ka Moya wa Hae, kwa Lubona lwa muhau, luinzi hamoho mwa libaka za Lihalimu ku Kreste Jesu. Kamita!

⁶⁸ Kakuli sina mubisi wa bupilo bwa butu ha u mela, u mela kuzwa ndate kuya ku ndate, kuya ku ndate, kuya ku ndate, kona mo bu melela ni Bupilo bwa Kreste cwalo.

Lani kona libaka Mulimu ha itusisa Moya wa Elia ha ketalizoho. Ki sikamañi sani? Ki ku ku shetumuka fasasi.

⁶⁹ Kuswana fela sina bupilo bwa mina bwa butu mo bu tisezwa fasasi ka kusulula kwa mali a bo ndata mina, kona mo inezi ni Moya wa Mulimu, o no lukisizwe kusamba kuba mutomo wa lifasi.

Mi cwale Linzwi la Mulimu kamukana, ka kutala, neli talelela mwa mubili o bizwa Jesu Kreste, mwani kona mo Mulimu na ni lifezi libi za ka, ku Yena kwani. Mi A ni zusa, ani zusa hamoho ni Yena, mwa zuho. Mi cwale lu inzi ni Yena, ka mata ni bundume fahalimwa diabulosi kaufela. Oh, kambe ne mu ka lumela fela seo Mulimu afile! Kono haiba ha mu si ka ina kwani, ha mu na zona. Mi haiba muinzi kwani, mi haiba ha mulumeli cwalo, mi musaba ku shenya, ha mu na ku li bona. Kono haiba muinzi kwani, mu ka itusisa sona, kakuli mu tomezwi kuli mueze se mu eza.

⁷⁰ “Faro,” kwa neku leliñwi, “na pepezwi ona musebezi o,” Bibele i bulezi kuli, ku ba Faro. “Judasi Isikariota na pepezwi kuli abe mwana wa sinyeho.”

Cwale mulemuhe Niti tuna ye lu talimezi ye.

⁷¹ Cwale lubona kuli keleke ne i hanile ku amuhela Linzwi la Mulimu kuli li ba buse, mi ya amuhela Barabasi mwa sibaka sani. Cwale, haiba mu bata Liñolo ka seo, ki Mateu 27:15 kuisa 23.

Kana ne si ezize sikamañi? Ki siemba mañi sene si ezize sibaka se? Cwale mu nahane ka zona. Fani lifasi la keleke, mwa mufuta wa bupilo bwa yona bwa kuluka kwa ku ongaonga, baana baba kenile, sina mo ne ba hupulela kuli nebali cwalo, mi ne bali mwa meto a sicaba, neba takisize Jesu, mi bali, "Hauna ku lumela kuli Muuna yo a lu buse." Mi Jesu nali mutalelela wa Linzwi la Mulimu. Joani wa Pili 1, ya i toloka. Mi kiha bali, "Haluna ku lumela kuli Linzwi la Mulimu le li lu buse." Ibo, Nali yena Linzwi, kono meto abona na foufalizwe ku sa Na li sona. Kakuli Nali yena kalabo ya sipolofita kaufela se ne sina ni ku to ezahala ku Yena.

Cwale, luna kaufela lwa lumela cwalo, kakuli lu libelezi ku si bona hape ha si ezahala. Kono haiba nji lifasi lakona, taba yani ki cwale, ona lusika lwa bumaswe lwa kacenu, bo ne bu lukela kuba kwa linako za kwa mulaho zani, baka eza taba yeswana ye ba eza kacenu, kakuli isali Linzwi leliswana, la lusika lo, linze li iponahaza. Baka eza sani. Habakoni kueza taba isili. "Ki bana ba baikanyisi." "Ba filwe bupumi bo bu tiile, kuli ba lumele buhata, mi ba bulawe ka bona."

⁷² Mulemuhe fo keleke ya lifasi hane isika amuhela Jesu, lona Linzwi, lene li iponahalize la lizazi lani, kakuli (kiñi?) neba na ni ku Li toloka ka nzila isili. Kono ne ba lukela kuziba kuli Na li yena Linzwi lani, kakuli lika kaufela za na bulezzi Mulimu kuli Uka eza, Na li ezize. Mi ki Hali ku bona, "Mubale Mañolo a hola ye; mi haiba ha Ni fiti ku ze tokwahala ze ne bulezwi ka Na kuli ni eze, konakuli musike mwa Ni lumela."

Ki ha bali, "Lu lumela Mushe."

⁷³ Yena ali, "Kambe mu lumezi Mushe, ne mu ka Ni lumela, kakuli Mushe nabulezi za Ka." Mi ni cwalo ne ba sika bona. Yena Mulimu wa Lihalimu yana shwile fa sifapahano, ni kubulela manzwi a swana ao mupolofita nabulezi kuli Na ka bulela, mi niteñi ne ba sika bona. Mwabona?

Ne ba si ba mufuta wa Hae. Ne ba si Linzwi, isi Linzwi; mi bona, kanti, neba li ba—ba bulapeli hahulu. Kono ne ba si Linzwi, kakuli Ne—Ne li ka lemuha sibaka sa Lona ka hola yani.

⁷⁴ Mulemuhe ka bunde Mañolo mwa tamahanelia ili ona hamoho mwa lusika kaufela. Cwale mulemuhe.

Mi cwale keleke ya lifasi hane i sika amuhela Linzwi la Mulimu kuli li ba buse, ne ba amuhezi sibulai, Barabasi. Kana ne si ezize sikamañi? Ne si bubekile Satani, yena mulimu wa lusika lolu maswe lo, kuya fa sibaka seo kamita na batanga.

Cwale muiteeleze. Kakuli, Satani habulelwia kuba mulimu wa mwa lusika lusili kwanda ona lusika loo. Na si ka bulelwa ka kuba mulimu wa lusika lwa Nuwe. Na si ka bulelwa kuba—kuba mulimu wa lusika lwa Mushe, mulimu wa lusika lwa Elia. Kono, ki lusika lolu maswe lo, ki yena... Oh, musike mwa tokwa kuutwa sani! Ki yena mulimu wa lusika lolu maswe lo, ulapelwa

ki bo lulelule ni ma bilioni ba sicaba, mi ha ba zibi. Kono ha lu tuheleni Mañolo a mu patulule kakusasana cwana, mi halu boneñi, mi kipeto muka ziba. Mutuhele Mañolo . . .

⁷⁵ Sina mwa mikopano ya temuhu, fani Moya o Kenile ha u banga mwa Linzwi la Hae mi U biza muuna yoo ni kubulela kuli, "Hauna musebezi wa kupila ni musali yomuñwi yo. Kiñi so no ezeza sani, myaha ye lishumi kwa mulaho, ha ne u mata mata ni musala mutu?" Ki sikamañi Sa sweli kueza? Ki ku mu apula, ku swabisa Satani, yani ki yena yana tamile muuna yani, kamba musali yapila ni muuna usili, kamba libi za ezize, lika za ezize. Sieza sikamañi? Sa mu patulula.

⁷⁶ Baalafi babanga ni liitusiso mi balika ku fumana se si fosahalile. Habakoni kueza cwalo. Halukoni ku ziba. Kono he Moya o Kenile ha utaha wa patulula seo ali sona, ni ku mu tisa fa ngandaleza. Mwabona? Cwalo kona Linzwi la Mulimu mo liinezi. Ki Liseli leli benya mwa lififi.

Mi ha mu ba ni lilata mwa sibaka, ku utwahala sina likunutu; sishañata sa lika zeñwi se si beleka, mi hamuna kuziba kuli ki sikamañi. Mutukise liseli, kapili . . . Lisende, mafele, ki—ki bana ba lififi. Mi cwale liseli ha li monyeha, za hasanela kwahule.

"Ba zwile ku luna kakuli neba si ba luna," Bibele i bulezzi cwalo. Mwabona? Halikoni kupila mwa Liseli la lifasi . . . Kakuli, Mulimu wa Lihalimu ulumile Liseli la Hae mwa mazazi a mafelelezo a, kuli A kone ku monyeha mwa nzila ya bana ba Hae, kuli basike ba zamaya mwa lififi ni ku sitatala, kono ba kone ku zamaya mwa Liseli lelibanya la Jesu Kreste, yena ya swana maabani, kacenu, ni kuyakuile. Amen!

⁷⁷ Mulemuhe, Satani habizwi mulimu wa lusika lusili kaufela kwanda lusika loo. Neli mulelo wa hae kuli abe inge Mulimu, kukala kwa simuluho luli.

Halu baleni sani. Halu iketen i fela. Halu kuteleni kwa mulaho kwa . . . Mwabona, Ni i ñozi fa, Isaya 14. Halu kuteleni fa ku Isaya 14, fa muzuzu fela, ni kubona sa nabulezi Mulimu. "Ka mulimu," sana ezize Satani. Isaya 14:12 ni 14. Mulemuhe.

Kana uwile cwani kwa lihalimu, O Lusifa, lilungwe la malungasiku! kana uwezi cwani fafasi, wena yana fokolisa linaha!

Kakuli wena uize mwa pilu ya hao kuli, Ni ka kambama ka lihalimu, Ni ka kambamisa lubona lwaka fa halimwa linaleli za Mulimu (bana ba bashimani ba Mulimu, cwale): mi Ni ka ina hape fa halimwa lilundu la kopano, kwa matuko a kwa mutulo:

⁷⁸ Neli mulelo wa Satani kuli alapelwe sina Mulimu. Nangile buñata luli, sikwata sa buñata luli bwa linaleli za Lihalimu. A kambamela fahalimwa linaleli, ni kukutaza ku zona, ni

kupuma sikuwa sa buñata bwa zona. Mwa bona nji? Ku lukile. Mulemuhile, wani kona mulelo wa hae.

Mi cwale uitukisize, ni munyalika wa hae ya ketilwe ka tokomelo, munyalika ya itutile ka zibo ya hae, mwabona, kaufela bona ba i pentile ka bupumi, ka miyaho yemituna ni likopano zetuna, ni mipende ya zibo ni buituti bwa za bumulimu, ni kutalifa ni bunangu, baba na ni tuto, kuli bapume lifasi loote, ni kuba “mulimu.” Sani kona sa ezize. Kaufela zona lifelela mwa sibupeho sa mutu yabizwa antikreste, ya sa filwe kale mushukwe wa kuli “muyemeli wa Mulimu,” ka munyalika wa sayansi, wa hae wa lilato la lifasi, kaufela bona ba apezi mwa bukabali bwa zibo, lituto za bulapeli. U ezizwe wa bulapeli sina yena, mi ka toloko ya hae ya Linzwi la Mulimu sina mwa na ezelize ku Eva, mane sina mwana hae wa mushimani Kaine mwa na ezelize.

Cwale mu bulezi kuli, “Mwana mushimani wa Satani?”

⁷⁹ Mu ni bonise sibaka silisiñwi mwa Bibebe fo Kaine akile abizwa kuli mwana Adama. Bibebe i bulezi kuli na li “mwana wa ya maswe yani,” peu ya noha. Batili, sikapi si yebuzwi cwale, muzwale. Likwese la mundandwe o pahami li kwaluzwi, sina sinulo ha i bonisize.

⁸⁰ Mulemuhe sa ka eza, mihipulo ya hae. Na hupula kuli Mulimu na pila bunde bwa lifasi. Na ezize cwalo mwa Lihalimu. Sibi ne si si kakalela mwa simu ya Edeni; ne si kalezi mwa Lihalimu, ki fani Lusifa, mwana mushimani wa lilungwe la malungasiku, na i pahamisa ili yena mwa bunde, mi na bata mubuso o munde ni kufita wani wa Mikaele. Mi na hupula kuli Mulimu na pila mwa bunde.

⁸¹ Mi mulemuhe Kaine. Na sa lati kuba ni sitabelo sa mali. Na tile mi ato fa sitabelo sa miselo, kamba—kamba simu ya bunde fa halimwa katala ka hae. Wa bulapeli hahulu, aeza lika kaufela, kuli, mane kuswana fela sina Abele mwa na ezelize; na file sitabelo, awela fapila Mulimu mwa milapelo, nali ya utwela ka nzila kaufela, kono na sina sinulo ya Linzwi.

Mi Linzwi ne lili teni, kukala kwa simuluho, mulelo wa Mulimu. Kono Mulimu na patuluzi, ka sinulo, ona taba ya teni ya Na pakile mi ne i bulezwi kuli i lukile. Isiñi bulapeli, isiñi katala, isiñi kuba wa siemba sa keleke, ha ki kueza sitabelo, ha ki kuba ya sepahala; kono ki sinulo ya Linzwi la Mulimu. Mulimu ku patulula ku yena seo sani . . .

Bo mahe neba si ka amuhela apule yeo noha ne ibofile, kono ne ba bile ni taba ya boozwa ni mutu wa Satani, wa sibupeho sa sibatana; isiñi sihahabe, kono neli ya talifele ni kufita, ya talifezi mukwazo mwa simu kamukana, sibupeho sa muuna, ili sika fela sinosi kone ku lukela ku kopanela peu. Cwale sayansi i lika ku mu fumana. Mi ha bana ku mu fumana, kakuli lisapo kaufela mwa mibili wa hae li cincizwe. Kono Bibebe ya paka kuli ku cwalo.

⁸² Mulemuhe sa ka eza mulikana hae cwale. Mutangana yo, “Uka ina mwa tempele ya Mulimu,” fo kikuli, ki keleke, “uipatulula iliyena kuba Mulimu.” Cwale haiba mubata kubala sani, yani ki Matesalonika ba Bubeli 2:3 ni 4, ni Sinulo 13:4, 11 ni 12; fani fa na ize, bapolofita bababeli, sibeli sa bo Joani ni Paulusi, ka sa na kaba sona mwa mazazi a maungulo. Cwale mu bale fateni, kakuli Ni i ñozi fa. Kono Ni...ka kusa sinya nako cwale.

⁸³ Lizazi le lupila ku lona li bizwa, mwa Bibele kuli, “ki lizazi la mutu,” lizazi la mutu. Le ha ki lizazi la Mulimu. Mulimu ha ki mulimu ka lifasi le; Bibele ibulela kuli Ha yo cwalo. Ki Mulimu wa Lihalimu. Kono le ha ki lizazi la Mulimu.

Le ki lizazi la kuketa. Ku lona, mupile la kacenu, ni kushwa; mukete Mulimu, mi mupile. Mi Mulimu ki Linzwi, mi Linzwi ki Linzwi le li bonahalile la hola ni lizazi le.

⁸⁴ Mulemuhe, “ki lizazi la mutu.” Haiba mubata ku ñola sani, Ne ni ka bala fateni. Kono Makorinte ba Pili 5:1-5... Makorinte ba Pili 4:1-5, muni swalele, Makorinte ba Pili 4:1 ni 5, neli Paulusi yana bulela ka ku atulwa ki mutu, mwa lizazi la mutu.

⁸⁵ “Lizazi, kiñi se mu li bizeza kuba lizazi la mutu?” ne muka bulela. Ki lizazi leo misebezi ya zibo ya mutu ilumbiwa.

Mutalime sani, litaba kaufela ze ba mbombola ba nyangela, yomuñwi ulika kuisa mutu yomuñwi fa kweli. Mulimu ulika kuisa mutu yomuñwi kwa Lihalimu. Mwabona? Kono mutualime mo ba itusiseza ma dollar ma milioni ni ma bilioni ni ma tililioni, mwa mufuta o sinyehile. Haba se ba fitile fani, hakuna se ba ka fumana. Ki butata mañi bo buli ni bona?

Hani na taba ka kweli. Ni bata kufita kapili fa kweli kuli mane Ni si ke na ibona; kuzwelapili fela kupahama. Ni bata kufita Nzila ye Sweu sina Mabisi, kuzwelapili kwa pata, kuzwelapili fela ku zamaya. Eeni!

⁸⁶ Mi lifasi kacenu la ipeya kwa zibo ye ne tile ka Satani. Mi lizazi la mutu la lumbekwa, isiñi ka Linzwi la Mulimu, kono ka zibo ya sika sa nani.

Cwale munahane. Mutuhele kuli sani sinwele. Mi hamuka liza tepu ye hape, fa katala fa, muyeme hanyinyani ni ku nahana.

Misebezi ya hae i pahami fahalimwa Linzwi la Mulimu ni misebezi ye iponahaza; butali bwa Satani, bwana file ku Eva kwa simuluhu. Cwale muteeleze; musike mwa mbwinja se. Butali bwa Satani bu pahami kwa lubona lwa milapelo, ku mutu, fahalimwa Linzwi la Mulimu leli pakilwe la hola. Likeleke za luna za paka sani ka mikopano ya—ya bona, likolo za lituto, zani za lutuwa hahulu kufita Linzwi la Mulimu mo li zibela ka Zona, ba nahana. Mi kwani, Dokota Wakuli-ni-kuli, ni Muluti Wakuli-ni-kuli, ni Caziba wa tuto Wakuli-ni-kuli u pahamisize zibo ya hae, mo ba ibizeza (yezwa ku Satani) niti, fahalimwa sepi so ya

Mulimu, ye ezipwe kupetahala fapila bona. Mi mutu wa ngiwa ka zona. Mwabona?

⁸⁷ Liki za ipumanezi za sayansi, kulika kunyaka Linzwi la Mulimu kuli lifosahalile. Munahane fela sa sani. Yena, za hae, zani ki, lituto za bumulimu, kutalusa Linzwi la Mulimu kwa sicaba, ni ku Li panga kuba leli sina mata, sina ha nabile ni lona cwalo mwa lusika lwa likopano fani Jesu hana iponahalize mwa lifasi. Jesu naize, “Mina baipi! Mina, ka sizo sa mina,” yani kona taluso yakuli, “mungile Linzwi la Mulimu ni ku Li eza kuba leli sina mata kwa sicaba.” Mi yani ki taba yeswana ye ba ezize ni kacenu. Halina mata.

⁸⁸ Mulemuhe, “Bona,” sicaba, “sa mu pahamisa fahalimwa sika kaufela se si bizwa kuli Mulimu.” Kikuli Matesalonika ba Bubeli ha i buleli cwalo nji? Mi bundume bwa keleke ya kopano, sicaba si lumela hahulu kopano yani kufita mo ba lumelela Mulimu. Mi Mulimu ki Linzwi. Ba ka lumela lituto za litumelo za bona za likopano fahalimwa Linzwi, ili “ze i pahamisa fahalimwa sika kaufela se sibizwa Mulimu.” Mi kuna ni Mulimu alimuñwi fela, mi lani ki Linzwi.

“Sika kaufela se sibizwa kuli Mulimu; kacwalo yena uba sina Mulimu ya inzi mwa keleke ya Mulimu, ubonisa kuli ki Mulimu,” kakuli una ni batu baba mu lapela. Mulimu ki Linzwi. Mi yena u i pahamisa fahalimwa sika kaufela se si bizwa Mulimu. Mi kuna ni Mulimu alimuñwi fela, mi Mulimu yani ki Linzwi. Mwabona? “Mi seo kaufela se si bizwa kuli Mulimu,” ki, mulimu wa lusika lo ya i pahamisa ili yena fahalimwa lika za niti, lona Linzwi leli pakilwe la Mulimu. Yani ki Muñoli Joani 1. Mwabona? “Fahalimwa se sibizwa kuli Mulimu, ona cwalo sina Mulimu mwa inezi mwa tempele ya Mulimu,” ka mata.

Mutalime, yena wa lumbwa ka zona! Oh, aku tuhele sicaba kuli, Mulimu, sibone buhata bwani! Wa lumbwa ka zona, mi mane ni kulumelwa kakutiya ki batu ba lusika lolu maswe lo. Cwale kana mwa bona mulimu wateni ni batanga ba hae ba lusika lolu maswe lo nji?

⁸⁹ Cwale halu boneñi ha li iponahaza. U bulela kuli uba pangela lifasi lelinde la kupila ku lona, ka zibo ya hae kwanda Linzwi la Mulimu leli sa palelwi. Kono ka kutaha kwa hae hamoho, mwa likopano, ni lituto za litumelo, ni bunangu, ni za sayansi, ni zeñwi cwalo, usweli kupanga lifasi lelinde kuli mutu apile kulona, kanti usweli kulatula lisepiso za Mulimu, kuli nako fela yeo lifasi lika swanela kupila kulona ki mwa Mileniamu. Mwa ziba, muhupulo waka, upangile lifasi lelinde mwa ku ezeza sibi isiñi mwa ku pilela.

⁹⁰ Mulemuhe. Kana na ezize cwalo nji? Na lumelelize sibi. Na lumelelizwe kunwa macwala, kuzuba kwai. Mi ni mwa likeleke, na lumelelize kuli musali abe wa siemba sa keleke, ni milili ye mikuswani. Cwale muyeme hanyinyani fa muzuzu fela.

⁹¹ Wa kona kutina tuputula, kutola mipende, mi niteni abe kwa neku la sikhata sa bulapeli bwa hae, ili ze lwanisana ni Linzwi la Mulimu. Na bulezi kuli ku likani. Mwabona butali bwa hae? "Kana sani sina ni sikamañi sa kueza ni musali?" Kuswana fela sina kuca kwa muselo o hanisizwe, kamba isiñi muselo o hanisizwe, sani kona seo sili sona. Mulimu na bulezi kuli kusike kwa ezahala cwalo, kono yena wa eza cwalo.

⁹² Mi musali wa mu lumela, mi wa mulata ka zona. U toile Mulimu. Likezo za hae tota lipaka kuli u mutoile. Ubulela kuli wa Mu lata, kono ulata Satani. U lapela mulimu wa mitinelo ya fashioni, mulimu wa lifasi, balimu ba basali ba Hollywood. Wa mu lata, kono u toile Linzwi la Mulimu la niti, ili yena fela Mulimu wa niti ya liteni.

Wa li lumeleza mwa likeleke. "Hakuna butata. Basali bahesu bakona kueza *se, sani, kamba sesiñwi*." Kono fa Pila kubatemi kwa Mulimu ya pila, musali mane ha lumelezwi nihaiba kukena, konji haiba wa baka.

⁹³ Mwabona, yena ki mulimu wa bunde bwa lifasi, u cwalo. Musali ubata kuli abonahale hande. Mi yena ki mulimu wa bunde, kuzwa kwa simuluho. Wa kona, mi ukonile ka butali bwa hae mwa sayansi ni libyana, kuli apange bunde bwa ba hae, ona lusika lwa kacenu lo...ona lusika lwa kacenu lo, nitaluse, lwa bumaswe. Lu pangilwe ka bunde.

⁹⁴ Mulemuhe. Ki kwa butokwa ku lemuha. Kwa simuluho, Seta ni bana ba hae ne ba si kaya ka nzila ya sayansi.

Cwale lu ka ambola za sayansi ka mizuzu ye likani. Ha Ni bulela se, ha ki ku yemela ku sa ziba kwaka; kono, ki sishañata sa butimbi bo butuna, sika kaufela se si latula Linzwi la Mulimu. Mwabona? Luli.

Ki kwa butokwa. Mu lemuhe cwale. Bana ba Seta ne ba si ka zamaya ka nzila ya sayansi. Ne bali balisana ba mitapi baba ishuwile, linjimi, ni zeñwi cwalo.

Kono haili bana ba Kaine neba kondisa. Kiñi? Ne ba susumezwa ki ndata bona, yena diabulosi. Kaine, na susumezwa ki ndata he, yena diabulosi, mi ni bona baba susumeza peu yene shetumuka cwalo yani.

⁹⁵ Mutualime peu Mulimu ye taha mwahala lusika kaufela, mi mulemuhe ko i libile kacenu. Bakreste, Bakreste ba niti, ha ki ba tikitibi ba sayansi ni lipatisiso zeñwi. Batili. Fa muzuzu fela, lu ka kena ku zani.

Kono Kaine na ezize, kuya ka sibupeho sa ndata bona, yena diabulosi, natezi butali bwa lifasi, bunde, ni sayansi, ni zeñwi cwalo. Bana ba Kaine neli ba sayansi. Neba itutile. Nebali ba balizi ba lilimba za lipina—lipina; bo Elvis Presley ba kacenu, zeñwi za lika ze cwalo sina sikolo se si buluka banana kwanu mo si ezeza mwa mikwakwa la Pelekelo ni pelekelo busihu. Bayahi

ba litolopo, ba sweli ku bonahalisa bunde basali kuli baba shukeliswe ka litakazo, sina diabulosi haafa basali mipende, ni kukuta milili yabona, ni ku ba kenya mwa tuputula, ni lika ze cwalo. Zani, ki za litakazo za hae fela ze masila. Sani luli si buhali, kono ha Ni zibi nzila yeñwi ya kubulela ka yona.

⁹⁶ Cwale, luziba kuli evangeli ya Satani ki evangeli ya sayansi ni zwelopili. Na i kutalize mwa Edeni; isiñi Mulimu; Satani ki yena yana ezize cwalo, ki sayansi ya zwelopili. Sayansi ni zwelopili ki evangeli ya Satani. Mutualime kwa lu fitisize kacenu, ni yona. Luli?

⁹⁷ Mulemuhe, na kutalize mwa Edeni, ku mañi? Ku munyaliwa wa Adama. Mi ki ha itakaleza zona. Na mu pumile ka ku mubaiza leliñwi la Manzwi a Mulimu. Halu boneni sa na lukela kubulela. Na lukela kubulela kuli, “Kushwa ha ki za sayansi, mwa keleke ye kenile ye.” Kamba, “Uka kena sikolo ni kuituta, isi ku lumela mwa lika ze sa koni ku utwahala za kuli lifu. Hanina taba haiba Linzwi la Mulimu ne likile la bulela cwalo; halitokwi ku nahaniseza.”

⁹⁸ Oh, mu mutualime kacenu. “Mulimu ki Mulimu yomunde. Mu mwa keleke ya Hae ye kenile; kiñi, hamukoni kushwa.” Kono Mulimu nabulezi kuli mukaba cwalo, mi ani kona mafelelezo. Kana mwa mubona kacenu njí? “Oh, kuba fela wa siemba sa keleke. Ha ki se mueza, kamba *se*, *sani*, kamba *sesiñwi*. Kutaha fela kwa keleke ni kuba membala yomunde. Kukuta milili ya mina, bwani ki bukuba. Ni kutina tuputula, ni ku ipenta mipende, ni kuya kwa mikiti ya kubina, ni tucwala nyana fa ni fa hasamulaho, halina ku mieza bumaswe, ibile fela ha mu ikenyi hahulu kuzona. Kaniti, ni sepa kuli mina banana mwa ikutwela zeo, ili kuli baitute haiba ba litabela kamba kutokwa.” Ki yani fani, yena mulimu wa lusika lo, lusika lolu maswe lo.

⁹⁹ “Mulimu ki Mulimu yomunde.” Ni utwile zani hañata hahulu kufitela Ni ba ya kula. Mulimu hape ki Mulimu ya sepahala. Yena ha swani sina kuku ya lemaza baikulu ya kona ku kashakiwa kafa ni kafa, mi baikulu ba Hae basina sibi ni sesikana. Yena ki Mulimu ya sepahala mi ukenile. Na pakile cwalo mwa simu ya Edeni, ka bana ba Hae ba pili. Mu sa sila fela museto wani, ulimuñwi wa Manzwi a Hae, mu shwile. Taba yeswana ya swana ni kacenu.

¹⁰⁰ Mi mulemuhe, na kutalize evangeli ka mukwa wani wa sayansi, wo zibala, wa tuto, ya zwelopili ya Evangelii ku Eva, mi munyaliwa wa Adama a li lumela. Mi akona kulyanganisa yabizwa kuli munyaliwa wa Kreste, ona keleke ya Adama wa bubeli, ka likañi zeswana. Yani ki niti.

¹⁰¹ “Oh, haki—haki za Mulimu; Mulimu ki yomunde hahulu kuli aeze cwalo. Kiñi, ibile fela wa yanga kwa keleke. ‘Haiba wa lumela.’” Diabulosi wa lumela; isiñi ku likanyisa ku lumela, kono kaniti wa lumela. Ha si ka piliswa. “‘Haiba njí ulumela.’” Huh!

¹⁰² Ubulelela munyaliwa wa bubeli, kamba Munyaliwa wa Adama wa Bubeli, ona cwalo za na bulelezi wa pili. Zeswana sina, “Cwale, foliso ya Bumulimu, hakuna taba yecwalo. Lwa kona kupaka cwalo. Haku sikaba kale taba ye pakilwe.” “Mi kolobezo ye ka Libizo la Jesu, cwale kikuli ha ulemuhi ki Na mata a keleke?” wa bulela. “Lu ambozi zani kwa Nicaea, Rome,” fani mioya ye milalu ye sika kena yani hane i zwile ku drakoni, bapolofita ba buhata, ni zeñwi cwalo. “Lwa lumela kuli kuna ni Balimu babalalu.” Oh, ka swanelo ya bunde! Sani ki sa buhedeni ka mo kukona kubela. Musike mwabe mutaha fapila Mulimu ni lika ze cwalo, mulike kuyema fapila Pata ya Hae. “Oh, ha si pang'i shutano ni yekana haiba mu kolobelizwe ka ‘Ndate, Mwana, Moya o Kenile.’ Ki shutano mañi ye si eza?”

¹⁰³ Ne si na ni shutano yetuna hahulu, kufitela Paulusi ha laela sikwata sa ba Baptist kuli ne ba lukela ku kolobezwa sincia ka Libizo la Jesu Kreste fani Moya o Kenile usika taha kale fahalimwa bona. Mi hape ni kueza kuli ba apositola kuhuwa, ni kubulela kuli, “Haiba lingeloi litaha kuzwa kwa Halimu ni kukutaza sika sesiñwi fela, libe leli kutilwe.” Kaniti, kuna ni shutano. Oh, mawi!

¹⁰⁴ “Hakuna sika sakuli kolobezo ya Moya o Kenile mwa mazazi a. Sani ni neli fela sa ba apositola. Li felile. Ni lika za kuli bapolofita? Mane halizibwi nihaiba ku zibwa. Limakazo? Haki za sayansi. Malaki 4? Yani neli ya lusika lusili. Joani 14:12? Oh, Jesu na sa talusi sani luli. Luka 17:30? Oh, lani neli fela litangu. Mwabona, neli—neli tolokilwe ka mufuta usili; ne lisiyo mwa buino bwa makalo.” Kubola koku cwalo!

Mi Mulimu Yamata kaufela hatahafafasi mwahala luna. Fani ha Na bulezi, kuli, “Jesu Kreste kiya swana maabani, kacenu, ni kuyakuile,” Wa paka sani ku cwalo. Hanina taba ka ya bulela sesiñwi ka sona; Mulimu wa Itolokelanga Linzwi la Hae kasibili. Na bulezi kuli Uka eza se mwa mazazi a mafelelezo. “Kukaba Liseli mwa nako ya manzibwana.” Mi kuna ni Liseli, kwa ponahazo ya Mwana Mulimu.

¹⁰⁵ Ona lizazi leliswana leli pazulelenga kwa upa ki lona lizazi leliswana leli likelelenga kwa wiko. Mupolofita na bulezi kuli, “Kukaba lizazi lelisike kubizwa musihali kamba busihu.” Ki lizazi la puka, la malu, fahalimwa pata ya lizazi. Kono naize, “Kono ka nako ya manzibwana kukaba Liseli hape.” Yena Mwana ya swana! Ki yena Alfa ni Omega. Yena Mwana ya swana yana pazulezi kwa upa na kulubelwa ku pazulela ni kwa wiko hape, mwa lizazi la mafelelezo, ona fani fela ku si ka fela kale lizazi. Ha ni zibi mo ba Li tolokela; Mulimu wa tolokanga Linzwi la Hae Kasibili. Wa Li paka. Ye ki nako ya manzibwana.

¹⁰⁶ Kwa swabisa, kono kaniti uwezi ku zona hape. Munyaliwa wa Kreste uwela ku zona, ni ku i kungela zibo ya mukopano

wa bakutazi mwa sibaka sa ku lumela Linzwi leli petehile, le lipakilwe la Mulimu.

¹⁰⁷ Cwale bakutazi kwande kafoo mwa libaka mo muinzi, mwakona ku sa lumelelana ni Se. Ha ni mi holofazi. Ni lika fela ku... Ni ambola kwa sikwata sa ka. Ni lika fela... Haiba mubata kuina, Ne ni kaba ya tabile kaniti kuli mu Li teelete. Mi kipeto muteeleze ku Lona. Mwabona? Kono Ni ba bulelela fela se ba—se ba boni, ni kuba bonisa sona; Mulimu wa paka cwalo, kuli ki niti. Mwabona?

Ye kona hola. Halitokwi mutu kuli a Li toloke. Zibo ya mina ya lifasi haina sesiñwi... Mwakona kuba ni B.A., D.D., A.D., kamba seo kaufela sili sona; ha si talusi sika kaufela. Mulimu wa Itolokelanga Linzwi, Iliyena. Na sepisize, mi ki le fa.

¹⁰⁸ Kono ka zibo ya mikopano ya bakutazi, mukutalezo wa kopano, “u tiselize lifasi kaufela ku komoka sibatana seo sitombo sa sona se si tuna ne si folile,” kuzwa ku za buhedeni kuya ku za bu popu. Mwabona ko ayo felela nji? Wa li lumela. Wa lumela zibo ya mu bulelela.

¹⁰⁹ Ku cwalo, cwale mutualime, kikuli banyaliwa bababeli baba beeelizwe bani ba lumezi zibo ya Satani mwa sibaka sa ku lumela Linzwi la Mulimu. Munyaliwa wa Adama na lumezi zibo ya Satani mwa sibaka sa ku lumela Linzwi la Mulimu, ni munyaliwa wa Kreste u lumezi butali bwa Satani, mwa lusika lwa butali lolu maswe lo, mwa sibaka sa Linzwi la Mulimu.

Mi mulemuhe. Eva, mwa butu, na li lumezi, ni ku kasheza lusika lwa batu kaufela mwa lifu. Munyaliwa wa butu! Adama, yena mutu wa butu wa lifasi; munyaliwa wa hae, a si ka kena kale ku yena, kuli abe musala hae, na kenyize lusika kaufela mwa lifu. Kamba ki za sayansi kamba kutokwa, lu shwa ka mukwa oswana fela, kakuli Mulimu na bulezi kuli uka eza.

Kamba muinzi mwa Edeni ye kenile, kamba keleke ye kenile, kamba kopano ye kenile, kamba seo kaufela ikona kuba sona, muka shwa ona zazi le mu ka tokwa ku lumela Linzwi la Mulimu kuba la Niti, ha Li pakilwe ni ku bonahala ku mina. Lani kona lizazi le mu ikambusa mina bañi ku Mulimu. Isiñi mubamba kaufela; Linzwi lililiñwi. “Mutu kaufela ya ka ekeza linzwi lililiñwi, kamba kuzusa Lililiñwi kwateren,” lani kona lizazi le mu ka shwa.

¹¹⁰ Mulemuhe, munyaliwa wa Adama na tisize lifu kwa lusika lwa hae, ona lusika lwa batu.

Mi munyaliwa wa Adama wa Bubeli, munyaliwa ya beeelizwe ku Kreste, u kenyize keleke kaufela mwa lifu la kopano, ni kunga nombolo ya sibatana, ka sayansi, ka ngana ya butu, likopano zetuna. “Luna luba Baptist. Luna luba Presbyterian. Luna luba Pentekota,” ni zeñwi cwalo. “Luna ni sakuli, miluna ni libyana zeñata. Luna, lwa zibahala kwa muuso. Luteni mwa lifasi kaufela,” ni lika kaufela ze cwalo. “Mi wa

butokwa, ni muyemeli wa tolopo, ni babañwi cwalo, batahangang ku luna. Mane ni yena Mutompehi wa tahanga ku to ba ni sebelezo ya mass ni luna, mi lwa tahanga ku *ze, zani*, kamba *zeñwi*.” Lifasi kaufela li kenyizwe mwa lifu la moyo, la kopano; keleke kaufela. U shwile!

Mu li, “Usweli ku zamaya misipili ye miñata.”

¹¹¹ Jesu naize, “Mo ne ku inezi mwa mazazi a Nuwe, ko ne ku pilisizwe fela mioyo ye ketalizoho ka ye milalu, kona mo ku kabela ni kutaha kwa Mwana mutu.” “Mwa mazazi a Lota, kone ku bandukile babalalu kuzwa mwa Sodoma, ka lizazi lani . . .” Cwale kuna ni sikhata se siile kwande kale, muhupule. “Kono, sina mo ne ku bezi ka nako yani, ka nako ya ka bonahala Mwana mutu.” Mutualime mufuta wa lizazi lateni, mutualime ko lu se lupila!

¹¹² Cwale utiselize lifasi kaufela kuli liamuhele tamaiso ya sayansi ya litukiso za lituto zeo Satani afile ku yena mwatasa libizo la keleke, tamaiso ya lituto, tukiso ya sayansi. Ni mi swaniseza mulimu wa lifasi le.

Fani musali, kakuba Eva, ha na bile ni maikuto a Linzwi la Mulimu mwa lizoho la hae, na ka shimba Linzwi la Mulimu. Kono ki sikamañi sa na ezize ku Sani? Mwa sibaka sa ku zamaeleta kolobezo ya Moya o Kenile, na tuhelezi sayansi ku paka ku yena kuli Moya o Kenile neli wa balutiwa.

Mwa sibaka sa kubuluka foliso ya Bumulimu kuzwelapili, kanti ka nako ye ulukela ku zusa bafu ni kueza limakazo zetuna; u tuhelezi Satani, mwatasa tamaiso ya hae ya mutu wa bulapeli, kunga Linzwi la Mulimu ni kulika kubulela kuli Neli la lizazi lisili. Mi a li lumela.

¹¹³ Fani, Bibele hane iize kuli, “Lika ze Ni eza mu ka eza ni mina.” Jesu nabulezi cwalo. “Muye mwa lifasi kamukana mi mukutaze Evangeli kwa sibupiwa kaufela.” Luna lusali libupiwa. “Lisupo ze li ka latelela mutu ni mutu kamukana ya lumela.” Wa Li latula ka mukwa wa lona kaufela.

¹¹⁴ Wa latula za moyo kaufela, mi a Li cincanisa ka munahano wa hae wa Bibele; koo baprista, ni bashemi baba kenile, mo ba babizeza, koo ma bishopu, bahulu ba mabishopu, koo ba okamela ba likiliti, batoneli ba batuna, ni babañwi cwalo, ba beile litoloko za bona bañi ku Lona. Mi Mulimu uba siile, uinzi fani, ba shwile sina twelufu kiloko.

Lika fela ze siyezi mwa mazazi a maungulo ki sikhata sa Mapentekota baba nyinyani ba lipina za kuhuwa katata mo ba konela, ku matamata kafa-ni-kafa fafasi, kubulela ka malimi ni kuhuwa, “ni kuba ni mufuta wa bumulimu, kono ba latula Linzwi lateni.” Kuba bulelela kuli ba kolobezwe ka Libizo la Jesu Kreste; baka miseha fa pila mina. Kono, sani, Mulimu wa si ezanga kuba ona cwalo ka kuswana, kupaka Linzwi la Hae kuba cwalo.

¹¹⁵ Mulemuhe, ona kota yeo Satani na tiselize Eva kuli ace ku yona, neli “kota ya bunde ni bumaswe.” Neli kota ye kopani kopani.

Cwale mutualime lizazi le lu pila kulona, fo Ha sweli kubiza Munyaliwa. Una ni keleke ye i papata kuli ieza hande, kanti ki bumaswe, ka kulatula Linzwi. Kota ye kopani kopani. Oh, muli, “Bana—bana ni tutengo totutuna. Ba—ba—ba—batusa se. Ni ba Red Cross ba li lumeleza. Ni likolo kaufela, bona... Mutualime kwanu!”

Oh, kono kulatula fela Linzwi lililiñwi, kona ze mu lukela fela kueza kuli mushwe; hakuna taba kamba ki za bunangu cwani, ka mo libezi zende. Jesu naize, “Mumela ulimuñwi wa umeza sico kaufela.” Siemba silisiñwi sa mumela si sinya sico kaufela. Linzwi lililiñwi la Mulimu, le li fosahala, li sinya Siswaniso kaufela. Kucwani lizoho laka hane likaba ko ku lukela kuba liutu laka? Mwabona? Kucwani haiba zebe yaka neikabafafasi fo ku lukela kuba lizoho laka? “Mumela o munyinyani wa umeza sico kaufela.”

Muli, “Kana muziba cwani kuli Ki niti?” Mulimu wa Li yemela kuli niti. Wa Li paka. Na Li bulezi mo mwa Linzwi, mi kipeto Wa Li paka. Cwalo kona mo lu zibela kuli Ki niti kamba kutokwa.

Kulatula fela Linzwi lililiñwi kona ze lukela kutisa lifu. Ne li tisize linepo zeswana mwa lusika lolu maswe lo, lifu la moya, sina mo ne li tiselize lifu la butu kwa lusika lwa batu kamukana.

¹¹⁶ Mulemuhe Satani mwana ngezi lusika lwani lwa ba sayansi kwa mulaho kwani, lwa Nuwe, ku itinga fa kutwisiso ya bona. Huh! Bibebe ya lu bulelela, mwa Liproverbia, “Usike wa yendamena kwa kutwisiso ya hao.” Mi, “Linzwi la mutu kaufela libe buhata, mi la Mulimu libe la niti.” Kono Satani, ka butali bwa hae, kuzwa kwa simuluhu kwa simu ya Edeni, na ngile sicaba kuli si itinge da butali bwa sona. Mi, mwa ziba, kuya ka misebezi ya hae yemituna ya Max Factor ya na nani kwa mulaho kwani, nabile ni basali ba bande hahulu kuli ne ba tiselize mwana mutu... bana ba bashimani ba Mulimu, nitaluse, kuwela mwa sibi ni ku ba nyala. Kulukile. Na... Basali neli ba bande hahulu, baba buheha luli.

¹¹⁷ Cwale munge musali wa fela fela fa mukwakwa kacenu. Buñata bwa mina mubalile likande; ha mu si ka liutwa fateni, kakuli ki la kale ni si ka pepwa kale. Pearl O'Brien, ki babakai babakile ba utwa za hae? Luli. Na lukela kuba musali yomunde hahulu ka kufitisa mwa lifasi. Kiñi, hakuna mwana sikolo yaya kwa ndu ya sikolo kacenu kono konji yomunde habeli sina mwana inezi yena. Kiñi hakuli cwalo? Bunde bwa basali bu lukela ku ezahala mwa mazazi a mafelelezo.

Ba kutile milili ya bona. Ba batinisa mwa tundelesi twa banana babanyinyani. Batina tuputula, ni liapalo za kutapa ni

zona, ni ka mo mu libizeza kaufela, ba icoleta zona. Ba ipeya mipende, ni kupenta fa milomo, ni mifuta yemiñwi ye kaufela, kuli babe sika se ba si sona. Mwabona? Kono kuya ka zibo ya sayansi ba konile ku ipumanela se. Kana mwa ziba kuli kuna ni zeñata hahulu ze sinyehela kwa mafula a basali, kufita zeliteni, mwa United States, habeli kamba halalu mwa buñata, sina ze sinyehela kwa lico za kupila ku zona? Mubatisise seo, yani ki niti, kwa mafula.

¹¹⁸ Mulemuhe, “Bana ba bashimani ba Mulimu ne ba boni bana ba basizana ba batu,” isiñi bana ba basizana ba Mulimu, “basizana ba batu, kuli neli ba bande,” mi ba tiseza bana ba bashimani ba Mulimu kuwela mwa ku pumiwa kwa. “Mi baikungela basali ba mifuta yani ni ku ba nyala,” mi za tisa lusika lwa buhule, sina fela mo ku inezi kacenu; sina mo ne kubezi mwa Sodoma, sina mo ku kulubelwa kubela kacenu.

Kuli, baana ni basali ba lizazi le ba cincana basali. Haiba ha ba lati mufumahali yo, baka—baka ya kwa Reno, Nevada, ni ku yo nyala; mi, kamba ku yo leleka, yani, ni kunyala hape mwa mizuzu ye lishumi ka yeketalizoho. Mi musali yomunde hahulu kuli mane bapalelwa ku tokolomoha. Mi ki sikamañi? Ki diabolosi! Mwabona kuli Satani usali mwa bunde? Mulemuhe.

¹¹⁹ Mulemuhe, sibi sani neba sika swalelwa ka sona. Lona lusika lwani lwa bunde, lwa sayansi neli lona lusika luli lolu maswe lo Mulimu akile asinya kuzwa fapila lifasi; lusika lwani lwa bunde, lwa sayansi. Jesu naize kuli kukaba cwalo hape ku sikaba kale kutaha kwa Mwana mutu. Ki niti kana? Mulemuhe, Jesu naize, “Ona mone ku bezi mwa mazazi a Nuwe, kona mo ku kabela ni fa kutaha kwa Mwana mutu,” fani kaufela hane ba likile kunyala . . . Cwale mutualime, “Bana ba bashimani ba Mulimu ne ba nyezi bana ba basizana babande ba batu,” mi Mulimu na si ka ba swalela ka sona.

¹²⁰ Nto yeswana fela sina tuto ya Balami, kuli na tiselize basali babande, baba talifile, ba sayansi ba Moabi kuli . . . ni meto abona a kalembeshwa, mipende ya hae ni mapauda, ni sende ya hae yende, kuli apume bana ba bashimani ba Mulimu; kulwanisa basali babona bene ba beleka ni kuba ni matutwa mwa mazoho abona, basina mipende kubona. Ku ba puma, kuli, “Ha lu nyalane ni, kakuli luna kaufela lu batu baba swana.” Bwani neli buhata! Neli bu—bu buhata, mi neli za na bata diabolosi, fa kunga bana ba bashimani ba Mulimu kuli banyale bana—bana ba basizana ba batu.

Neli buhata bwa diabolosi, bwa Balami, yena mupolofita wa buhata yani, kulika kupolofita kulwanisa Mushe yana lika kuswala lusika hamoho; kubulela kuli, “Kulukile, lu lumela Mulimu alimuñwi. Lu fa litabelo ze swana. Luna ni litabelo zeswana. Lueza lika kaufela ka kuswana fela.”

“Bukaufi luli kuli mane lika puma nibona ba Baketilwe haiba kwa konahala.” Mwabona? [Hakuna manzwi fa tepu—Mu.] Muzwe ku yena, sicaba! Hamuna sa kueza ni yena!

¹²¹ Mulemuhe, ne ku sa swaneli kuli Mulimu na ka toloka Linzwi la Hae kwa lusika lolu maswe lwa Kaine. Batili. Mulimu na si ke ku toloka Linzwi la Hae ku bona. Mulemuhe . . . [Hakuna manzwi fa tepu—Mu.]

Mulimu, zibo ya kueza lifasi kuba lelinde hahulu cwalo la sayansi mi la sibi, Na nani ku lisinya? Kana Mulimu na ka eza sani, kupanga lifasi lelinde hahulu; mutualime kwanu, Mulimu kupanga bana ba Hae ba basizana kuba babande hahulu, ni kuba tinisa ze mapunu hahulu, kuli bana ba bashimani ba Hae baba lakaza mi baeze boozwa? Sikamañi? Mulimu aeze sika se si cwalo?

Sikwata se si mapunu se, sa ma Laodesia, banze ba lapela mulimu wa lifasi le, kuya ka lizo za bona, ni tuto, ni butali, ni bunde! “Amuzwe ku yena,” Bibebe i bulezi kuli, “musike mwa i kabela kwa libi za hae, mi musike mwa amuhela kwa likoto za hae.” Mulimu uka neli sa ñundupula kuzwa mwa lihalimu zazi leliñwi, butuna bo bulikana sina lipaundi ze mwanda siemba sa teni, mi uka musinya ka ku mu pobaula ka macwe; sina Linzwi la Hae ha li bulelezi kuli Uka eza, milao ya Hae.

Kihande, haiba Mulimu akile aeza taba yecwalo, ku patulula Linzwi la Hae kwa sicaba se si cwalo, Na kaba—kaba ya koma mulelo wa Hae luli Kasibili. Mulimu ha ki sikuba. Ki yena makalelo a butali kaufela.

Kacwalo mu boni ko kuzwelela lika zani? Lizwa ku Satani, mi isali za Satani. Mi keleke i lilumezi.

¹²² Cwale mwa bona, basali, Ni lika mo ni konela ku mi bonisa Linzwi la Mulimu. Bibebe i bulezi kuli, “Haiba musali ukuta milili ya hae, ushubula toho ya hae,” yeli muuna hae. Mi muuna hae ki yena toho, ni Mulimu, konakuli ushubula Mulimu ni muuna hae.

¹²³ Cwale taba ye i bonisa yena yali toho ya mulao wa keleke ya lifasi le. Sani si bonisa yali toho ya yona. Ki Satani, mwa mufuta wa mutu ya ipitezi, mutu wa butali, butali bo bu ipitezi. Wa ziba kufita kaufela baba siyezi. Hakuna taba kamba Linzwi li bulela sikamañi, una—una ni toloko ya hae ka Lona, mwabona, toloko ya lusika lolu maswe lo.

¹²⁴ Mulemuhe milelo ya hae ya ku yaha keleke ya kopano ye ipitezi, Katengo ka Likeleke za Lifasi, mwabona, katengo ka buipiteli, ili kuli lifasi kamukana li mu lapele, ona sibatana, mwataswa libizo la Bukreste bo bu tamahani. Kikuli mwa tabelia kubala seo mwa Bibebe? Sinulo 13:6 ni 8. Ki tawala ya kacenu ya Babele.

¹²⁵ Kana ha mu hupuli kuli fani Nimrod, muipi yani, hana yahile tawala yetuna ye ni kueza kuli mileneñi yemiñwi kaufela ife likute ku yona? Babole ni Babele ki nto ye swana. Icincanga fela mabizo a yona, mi, hainze i taha i pahama cwalo. Ki, Rome cwale seli Babilona. Mi lifasi kaufela litisizwe mwa Babilona, mi likenyizwe ki Katengo ka Likeleke za Lifasi kaka eza kuli yomuñwi ni yomuñwi wa bona a mu kubamele. Mi mungile nombolo ya sibatana, mu sa zibi sene musweli kueza. Kakuli . . .

Kono bani baba ketilwe baka utwa Linzwi ni kuzwa ku zona.

¹²⁶ Mo kopano ilwaniseza Linzwi la Mulimu! Na si kaba fateni ni iliñwi, ali kuba asebelisane ni iliñwi, mi ali kuba abe ni tamahano ni iliñwi. Ni bata kuli batu ba litaba za kale ba ni bonise mupolofita yakile azwa mwa keleke. Mu ni bonise ko Mulimu akile a fuyola keleke yene . . . kasamulaho ha ikongakonga. Ne i pahami fa halimu ni kushwa, ni butali bwa zibo yezwa ku diabulosi, ka baeteleli ba bona, ni kuhana Linzwi la Mulimu hane Li nze lihula mwa sibupeho se si petehile sa Kreste. Cwale seli kwa toho. Ki ku shutana ko kucwani!

Mu kauhane ni Eva ya sa lumeli yani, mina bana ba Liseli la manzibwana!

¹²⁷ Satani, mulimu wa lusika lo, ka zibo ya hae, ungile sicaba kuli si ce kwa kota ye kopani bunde ni bumaswe. Mulemuhe, Satani, ka zibo ya hae, utiselize sicaba sa lusika lolu maswe lo kuli ba ce kwa kota ya hae ya bunde ni bumaswe. Ubulela kuli usweli ku yaha zwelopili yetuna ya Bukreste, ka zibo ya hae ya bunde ni bumaswe, zwelopili yetuna ya Bukreste.

¹²⁸ Kono Mwalyanjo yomunyinyani wa Kreste, Linzwi, Mutapi, Munyaliwa, hana taba ka zibo ya hae. Wa mubeya, yena, ku lukuluha ku yena. Ki sikamañi . . . Cwale halu amboleñi ka Yena, fa muzuzu. Unza libelezi Mulena Hae ni Mileniamu ya Hae ku yo ba ni tabo ya linalo, luli, ni Munyali wa Linzwi, kakuli ki Yena Munyaliwa wa Linzwi.

¹²⁹ Zibo ni zwelopili, ni Bukreste bwa niti, halina swalisan ni yekana. Zwelopili, ni Bukreste bwa niti, halina ni haiba taba iliñwi mwa swalisan.

Zwelopili ki ka zibo. Luna kamukana lwa ziba cwalo. Mi zibo izwa kwa Edeni, i pakilwe cwalo, ka sa na kutilize mwa Edeni. Mi zibo itisa lifu. Kana ki niti yeo? Ki sikamañi sene sitisize lifu mwa simu ya Edeni? Zibo. Kono haikoni kuba ya Mulimu, konakuli ki ya diabulosi. Whew, kana yani neli yende! Zibo, sayansi, tuto, kona sisitatiliso sesituna kufitisisa seo Mulimu abile ni sona. Ki za diabulosi.

Cwale Ni ka nga mañolo nyana ku sani, Na ziba. Ni a libelezi.

¹³⁰ Mutualime ko sizo si lu tisize cwale. Mwabona? Mutualime se si ezahalile. Kana lu kai? Lu yendamezi kwa lika zani, ka kutwisiso ya luna bañi ka sayansi.

Mu li, “Kucwañi he ka Mulimu, munahana kuli Ki sitimbi nji?” Oh, batili.

Mulimu uka itomela zwelopili ya mufuta wa Hae kasibili mwa lifasi, fani Ha ka ubusa. Le ki lifasi la Satani; ki yena mulimu cwale wa zibo ya sayansi. Kono Mulimu uka toma mufuta wa zwelopili ya Hae Kasibili. Haina kuba zwelopili yeswana sina cwana. Mu hupule fela sani. Haina kuba mufuta wa zwelopili ye luna ni kacenu. Batili, batili. Ikaba kuya ka Linzwi la Hae ni mulelo wa Hae. Kakuli, mulimu wa lusika lwa kacenu lo uka sinyiwa, ni mubuso wa hae.

¹³¹ Lusika lo lwa kacenu lo lu lata zibo halukoni kuba ni mueteleli yomunde kufita ye ba nani, Satani, mulwanisa wa Linzwi la Mulimu, sina mwana kalezi mwa simu ya Edeni, kono ki mutu wa bulapeli ya itingile fa kutwisiso ya hae fela.

Sina ha Ni bulezi sapili, Liproverbia 3:5, kuli, “Ha lu lukeli ku tiyela fa butali bwa luna.”

Ba lukela kuba ni mulimu, kakuli ki batu. Ibo, wa ba eza kuba se ba bata. Ka kuba mutu, kamita, libupiwa za batu kaufela... Hane lu tile kwanu, ne lu fumanu ma Indian inge ba lapela milimu, ni lizazi, ni lika kaufela. Kakuba mutu, ba lukela kuba ni mulimu. Kacwalo ni lusika lo lwa butali lu lukela kuba ni mulimu, kacwalo lu fetuhile kuba... Yena mulimu wa lifasi le ufetuhile kuba zibo, kopano, sayansi, “kuba ni mubonahalelo wa bumulimu, kono ba latula Mata a teni.”

¹³² Mulemuhe, mulimu wa bona uba eza kuba ze ba bata. Ba lakaza za nama, mi sani kona sa bafa. “Ba tabela kutina liapalo za kutapa ni zona. Ha ba tinanga. Mwabona? Haiba ba bata kueza *se kamba sani*, ha ba eze. Hakuna butata ku sona; ba ya kwa keleke. Ma bona neli Methodist, Baptist, Pentekota, Presbyterian. Mu ba tuhele baikinele.”

Yani ki yena mulimu wa lusika lo; u butali, u talifile, wa sayansi. Ha itokwi tumelo. Ha ku tokwa ku boniswa sika kaufela. Li pakilwe kale, ka zibo ya bona. “Kihande, ki luna keleke yetuna ku ze liteni mwa tolopo,” zibo ya bona. “Mulisana wa luna una ni D.D., Ph.D.” Mwabona, halitokwi nihaiba tumelo; li itingile fa zibo. Ha ba pile mo ba latela, ibile fela ba taha kwa ku mu lapela ka kopano ya bona ni tuto ya litumelo. Kuna ni liito le lituna lelinsu kwani, kono mu li talime.

Baseha Linzwi la Mulimu, ba bulela lika ze shutana ni Linzwi; ni kulika, ka zibo ya bona, kupaka ka sayansi kuli Linzwi ha ki la niti. Oh, ki lusika mañi lolu pila ku lona! Mwabona mulimu wa lusika lo kana?

¹³³ Mulemuhe, kono Mulimu ulibelezi kufitela bumaswe bwa Maamori ba kacenu ha bu ka talelezwa. Musike mwa bilaela, Ukaba ni Mushe wa Hae ya itukisize ka nako yani. Ku kaba kututa, zazi leliñwi, kuya kwa naха ya sepiso. Kukaba Mushe

yaka taha, ya ka biza, “ku kutisa Tumelo ya bana kwa bashemi.” Ika taha, leliñwi la mazazi a. Kikuli . . .

Mu li, “Kihande, mutualime mo lu sweli kuzwelapili.”

Luli, bumaswe bwa Maamori ha bu sika talelezwa kale. Bu ka taha, leliñwi la mazazi a. Ku ba tuhela kuli ba yunde.

¹³⁴ Zwelopili, zibo, i lyanganisa Linzwi la Mulimu kuli iswane ni maikuto a yona. Kopano kaufela ieza ka ukwa oswana. Satani kipeto wa kutaza evangeli ya zibo mwa keleke ya hae.

¹³⁵ Kuna ni fela likwata zepeli za batu ze bulezwi mwa Testamente Yenca. “Bana ba Mulimu, ni bana ba diabulosi.” Kana mwa ziba cwalo? Mubata kuñola Liñolo la zona? Joami Wapili 3:10, haiba mubata Liñolo. Na i bala onafa, ni liñozi fa. Ku lukile. Ku lukile.

¹³⁶ Mwa Maefese 2:2, ba bizwa kuli, “Bana ba bahanyezi.” Sina Eva mwana inezi, baba sa utweli Linzwi la Mulimu. Bana ba baba utwa, ni baba sa utwi, habana lika ze swana.

Konakuli Munyaliwa wa Kreste ukona cwani kuba ya lumelelana ni kopano, haiba yomuñwi ha utweli mi yomuñwi wa utwela? Kana yomuñwi ukona cwani, abe Linzwi; mi yomuñwi, ki linzwi leli kopami? Kana lihule ni musali ya lukile baka kona cwani ku zamaya hamoho mwa kutwano? Ha ba komi kueza cwalo. Habana kutwano ni hanyinyani. “Muzwe mwahala bona!” Ki za diabulosi. Ki nombolo ya sibatana. Lisweli kukena mwateri luli ona fa cwale; likopano kaufela. Hanina taba kuli ki za mañi.

Mulimu usweli kunga, ha ki kopano, “ki sicaba sa Libizo la Hae.” Kopano haikoni kuamuhela Buniti bo. Si lwala mutu anosi ya kona kubona Mulimu, kutilima fa Linzwi la Hae ni ku Li lumela, ni kutokwa kuba wa kopano kaufela; kono apilele Mulimu, isiñi kwa kopano ya hae, ye lutilwe ka bishopu yomuñwi wa zibo ya butali. Yani ki niti.

¹³⁷ Bana ba bahanyezi, ni bana baba utwela, habana lika zeswana. Iliñwi ya zona . . . ki ya lizazi la Liseli; yomuñwi, wa busihu ni lififi, lusika lolu maswe, lusika lolu maswe lwa lififi lo, mikiti ya busihu, kubina, i mbo ki ba siemba sa keleke. Ku likani ni mulimu wa bona. Habana se si banyaza ni hanyinyani ka zona; hakuna se si ba bilaeza.

“Kiñi, ha si nifi mulatu ha ni kuta milili yaka,” musali abulela. “Usike wa holofaza lizwalo laka.” Hana lizwalo ni lelikana sina noha haisina linoka. Yani ki niti. Kaniti kutokwa. Ha zibi kuli lizwalo ki sikamañi. Li ba bukile katata luli kufitela mane ha sa ziba kuli ki sikamañi. Yani ki niti.

¹³⁸ Ku zamaya kwa ni kwa, fahalimwa Linzwi la Mulimu, kubulela kuli, “Kiñi, yani ki puka ya kale. Usike wa ya kwatenei kwani; ki sikwata fela sa lilata ni kuñala, nihakulicwalo.” Huh!

Hakuna ya ziba Mulimu sina Mbonezikai mwa sa zibeli busihu bwa Egepita. Ku lukile. Ki niti.

“Kuba ni mubonahalelo wa bumulimu, kono ba hana Mata ateni; kuba ba cwalo musabe kwatensi. Kakuli ba kona ba mikwa ye kundana ndu ni ndu, banze bakenela basali nyana.”

“Oh, mulikani, wena, u lukela kueza *se*. Oh, mulikani, Na sepa mukutazi wa mina ya sa zibi lika wa kale kwatasi kwani, kambe ne mu ka . . . Oh, no ka bonahala hande mwa kalukwe ka kutapa ni kona,” kamba mu ka biza cwani kaufela ka nto kani. “Wena, kambe no ka eza *se*, *sani*, ni *sesiñwi*. Kiñi, ka kwai nyana haka koni ku holofaza mutu. Ni wa siemba sa keleke, mi mwa ziba kuli kopano ya luna isepilwe maswe sina mo ibezi ya batu babañwi kaufela.” Usike wa lumela lihata leli pentilwe la kale lani. Wa mi puma. Yani ki niti. Eeni, sha.

¹³⁹ Ku lukile ka mulimu wa bona. Oh, unahana kuli zani ki zende, mi ba mu lata fela ka zona.

Mawi, baka ku kananisa. Baka yema ona fani ni ku mi kakanisa ka zona. Kiñi, luli, Satani na yemi fapila pata ya Jesu Kreste, Linzwi, ni kulika kubulela kuli, “Ku ñozwi.”

Mi ki Yani fani, ona Linzwi leli pakilwe la Mulimu. Na ize, “Zwa ku Na, Satani!” Muye fela mi mueze taba yeswana.

Sina mutu hana ize kuna nako yeñwi, kuli, “Cwale, haiba wa lumela kolobezo ya Moya o Kenile kuli i lukile, mi mulumela kuli u nani Ona,” kuli, “cwale u ni nate ka bubofu.” Yani neli mukutazi. Ali, “U ni nate ka bubofu!” Na ize, “Paulusi na—na natile yomuñwi ka bubofu zazi leliñwi.”

¹⁴⁰ Se nili, “Muñaka, kana Ni kona cwani ku kunata ka bubofu kanti wena u sibofu ni kale? Ni kona kuku bulaya cwani kanti u ya shwile kale?” Uh-huh.

Ki hali, “Na, meto aka ki mashumi amabeli ka mashumi amabeli!”

Se nili, “Siemba sa hao sa butu; kono usali sibofu.”

“Ha ku konahali! Bibele ha itoloki lika. Lu bulela fo Bibele i bulezi, ni kukuza fo I kuzize.”

¹⁴¹ Se nili, “Ku lukile, fani Elia hanali kwani kwa—kwa Dotani, mwabona, kiha kutaha mpi ya ma Siria mwateni. Mi mutanga amata, ali, ‘Oh, bo ndate!’ Ali, ‘Bo ndate,’ ali, ‘ma Siria ba lu potolohile.’”

“Elia aitiinya mwa meto a hae, ananuha ni kubulela kuli, ‘Kuna ni babañata babali ni luna kufita babali ni bona.’”

“Ki hali, ‘Hani boni ni yomukana.’”

“Ali, ‘Mulimu, kwalula meto a hae.’ Cwale, nali sibofu. Mi atalima kwa matuko a mupolofita wa kale yani, mi fahalimwa malundu; ne kutezi Mangeloi, ni likoloi za Mulilo, ni lipizi za Mulilo.”

“Mi ki ha ya kwani, mi Bibebe i bulezi kuli, ‘Na ba natile ka bubofu.’ Kufoufala kwa sikamañi? Ku yena. Na zwezi kwateni, ali, ‘Kana mubata Elia?’”

“Eeni, lwa mu bata.”

“Ali, ‘Amu tahe, Ni ka mi bonisa kwa inzi.’ Elia ubaisa ku Elia. Bubofu!”

Se nili, “Kana wa ziba se Ni ka bulela ku wena? Ona cwalo fela sana bulezi Mulena ku ndataho, ‘zwa kuna.’” Uh-huh. Uh-huh.

¹⁴² Mulemuhe, bana baba utwela, ni baba sa utweli, habana lika ze swana. Baba sa utwi ba lapela mulimu wa bona. “Oh,” ba bulela kuli, “lwa lumela Bibebe.” Eeni, ki kota ye kopani kopani. Mwabona, ba ekeza lifasi ni zibo ku Lona. Kota ya Satani, ikopani; mwabona, musali nacile kwa kota Satani, bunde ni bumaswe. “Oh, lwa lumela Linzwi.” Luli, kono isiñi kaufela Lona. Eva na lumezi Linzwi, ni yena, kono atuhela—atuhela Satani kunga kota ya hae ni ku Li lyanganisa hanyinyani. Sani kona mo si inezi.

“Mutu kaufela yaka ekeza linzwi lililiñwi, kamba kuzusa Linzwi ku Lona.” Yena usali ya swana maabani, kacenu, ni kuyakuile! Mulemuhe. Ku lukile.

¹⁴³ Lusika lolu maswe lo ki lwa lififi, ibo ki lwa keleke. Mulimu wa bona, ba mu lata ka sona, ka mukwa wa ba tuhelela kueza. Habana buinyazo. Hakuna se si ba bilaeza ibile fela ki ba siemba sa keleke.

Balami na lutive keleke lika zeswana. “Ha lu swalisanenñ; luna kaufela lwa swana.” Neli makilikicani a mafelelezo. Mulimu na si ka ba swalela ka ku lumela buhata bo bu cwalo.

¹⁴⁴ Muhupule, neli sibi se si sina swalelo, linako zetalu mwa Bibebe, kuli mutu kaufela aekeze linzwi leliñwi la mutolokelo usili kwa Linzwi la Mulimu kasamulaho Limano pakiwa kuli ki Niti.

Mwa simu ya Edeni, kulukile, mwa simu ya Edeni, linzwi lililiñwi lene li ekelizwe latisa lifu.

Fani Balami hana ekelize linzwi, kuli, “Luna kaufela lwa swana,” bona, Mulimu na si ka be a swalela Isilaele ka sona. Mutu ni mutu wa bona ba shwezi mwa lihalupa, kwanda babalalu bao Mulimu na bandusize.

Jesu naize, “Kiba, mutu ni mutu, na shwile,” kwani ki ku kauhana Kuyakuile. Kaufela bona baile; ne ba sika swalelwa. Ki sibi se si sina swalelo; ne ba si ka swalelwa. Oh, mawi!

Musabe ku zona, bana ba Liseli la manzibwana!

¹⁴⁵ Mwabona cwale yali mueteleli wa lusika lwa kacenu, lwa bulapeli, lolu maswe lo njí? Ki diabulosi, ungile kota yani ya bunde ni bumaswe, ni ku libeya kwande kwani, mulemuhe,

kutisa munyaliwa wa hae yomunde wa keleke mwa katengo ka swaliso kwa sinawenga. Yani ki yende. Keleke ya hae yende ya sayansi, ni ma—ma—ma digiri kaufela akona ku ipumanelwa; ma Ph.D kwande a keleke ya Kreste, ma Ph.D azwile mwa Baptist, Presbyterian, Pentekota, ni bao kamukana. Kubatisa kaufela bona, ni liapalo za bona zende ni likeleke zetuna, kaufela zona mwa katengo ka swaliso, “Lu ba libañwi.” Halina ku swalela ku bona. Kopano, kuba ni libizo la kopano, ki nombolo ya sibatana. Lu se lu felize kale za yona mo; ka kueza cwalo. Musabe kwateni, bana, musabe kwateni! Mwabona? Keleke, yetuna yende kwa mitinelo ya swaliso, kutina nombolo ya hae!

Tuputula, luli, mitinelo ya lifasi, ya butanya, mipende, luli ki balutiwa ba bande ba diabulosi, kuli baswale bana ba bashimani ba Mulimu; ku nyalwa ku mushimani ya hulile ku muikanyisi ya cwalo. Yani ki niti. Ha ki . . .

¹⁴⁶ No ize, “Kukuta milili, kana sani sina ni sikamañi sa kueza?”

Muzwale, halu yemeñi ona fa pili fa muzuzu fela. Ni utwa fela kuli kuna ni ya hanyelize sani. Mwendi uinzi mwa mawaile kwande kokuñwi.

Muteeleze. Milili ku musali ki buitamo bwa si Nazareni. Milili ku Samisoni neli buitamo bwa si Nazareni. Mi he musali akuta milili ya hae, yena—yena kipeto ulatula buitamo bwa hae bwa si Nazareni kuli ki Munyaliwa ku Kreste. Kakuli, fani, ona taba iliñwi yani, usinya Siswaniso kaufela. Ka swanelo! Mu *Nazareni* ki “mutu ya ipeile ka mulelo omuñwi.” Kana ki niti yeo nji? Samisoni na beilwe kwa lusika ni kwa mulelo, kacwalo nana ni milili ye mitelele. Musali yali mwana Mulimu, uka tuhela milili ya hae kuhula, ili ku bonisa kuli uipteile kwa Linzwi la Mulimu kamukana.

¹⁴⁷ Haiba wa i kukula kwateni, Hanina taba kamba ubinanga cwani, kuopela, umwa kwaya, ubulelanga ka malimi, umata kafa-ni-kafa, kamba una ni mufuta kaufela wa tutengo twa lituso, ki ya shwile. Sani KISONA SA BULELA MULENA, ona Linzwi la Mulimu. Makorinte Bapili 14. Eehe. U latuzi buitamo bwa hae bwa si Nazareni ni ku lekisa ku mulimu wa lusika lwa kacenu lo. U ezize cwalo. Cwale, maswabiswa ku wena, kalibe, kamba musali!

¹⁴⁸ Luli ki kuswasa bana ba bashimani ba Mulimu, sina mone ku inezi. Sina Jesu hana ize kuli, “Mone ku inezi mwa mazazi a Nuwe, basali babande, mi bana ba bashimani ba Mulimu bakala kunyala mwahala bona, kona mo ku kabela ni Mwana mutu haka yo kuta.” Mi mulimu wa bona unahana kuli ki zende, ni bunde, ni kuba za sayansi, zibo; fashioni ya Hollywood, ya mufuta wa sintolo sa hae, luli, lika ze lamatela ze kaufela ni zeñwi, mwa ziba.

¹⁴⁹ Mi yena, keleke ya hae, ya li lata ka bunolo! Oh, mawi! “Ni ka kufa kuli uutwisise, Ni wa Methodist. Ni wa Presbyterian.

Bo mulisana luna bana ni ngana hahulu kuli ba kone kubulela lika ze cwalo.” Hana ngana yeñata kuli abulele lika zeo Mulimu abulezi he. Mwabona?

¹⁵⁰ Musali, yona keleke, ka bunolo ya li lapela. Ya li lata. Ona cwalo fela sa bata! Hana ku ikopanya kwa sika kaufela, muzwale, kamba kutaha ku zeñwi kakuli ulukela kueza sina nto yeñwi yesutana kuzwa ku bo Jezabele ba kacenu mo ba inezi ba, kakuli wani kona mufuta oli ku yena.

Kana ukona kuba cwani mufuta usili... “Ki mañi ka lipilaelo ya kona kuekeza ñokolwa iliñwi kwa butelele bwa hae?” Haiba no pepilwe kuli ube yo mutelele ka liñokolwa ze ketalizoho, hauna kuba wa liñokolwa ze silezi kwa butelele. Oh, ehe, sina “mushini wa kuikotolola” wa Booth-Clibborn.

¹⁵¹ Cwale teeze, muuna, mina sikwata sa ma Ricky! Haiba no pepilwe kuba muuna, konakuli upile sina muuna. Ona mikiti ye lepelela mwa lipata za mina, ni ku bondoloka sina kalembeshwa ka butanya, kiñi, mina lusika lolu lyangani lwa linoha! Ki butata mañi bobuli ni mina, kanti?

Mulimu waka uka atula naha ye zazi leliñwi ka mulilo. Uka li tibisa mwatasa liwate. Hola ya katulo ya Hae i sutelezi fakaufi. Lifasi kaufela lika iconga.

¹⁵² Kulyangana kwa bulapeli! Kulyangana kwa butu; baana ha ba sa ziba kuli ba fumaneha kwa sibupeho sifi, mane ni bona basali cwalo. Ba yema bali kutina malukwe a obolosi, kamba kaputula kakañwi ka kale, litino za... muzamao wa hae kaufela ni mufuta kaufela wa mubili wa hae, ni kuipiza iliyena kuli Mukreste. Yena mane ha ki kalibe, kamba mane kuba Mukreste. Musali yani ki lihule la fa mukwakwa le li itusiswa ki Satani, ususumelizwe ki Satani, kuli a lume bana ba bashimani ba Mulimu kwa lihele, ili kutaleze Linzwi la na bulezi Jesu Kreste kuli lika ezahala. Ne ni sa bati kubulela cwalo, kono Na bulezi cwalo, nihakulicwalo. Mwabona ko kuzwelela moyo wo wa bulapeli nji? Ki kota ye kopani kopani.

¹⁵³ Bali, “Ki butata mañi bo buli ni tulukwe twani,” kamba ba tubiza cwani kaufela, “tu pedo-push?” kamba seo kaufela sili sona.

Bibele i bulezi, kuli, “Musali kaufela ya katina sibyana kaufela sesi lukela kuba sa muuna, ki maswabiswa mwa meto a Mulimu.” Sani KISONA SEI BULELA BIBELE.

Mi musali yaka kuta milili ya hae, ushubula toho ya hae. Mane ha kikuli... Ki taba ye swabisa kuli musali afe tapelo ni milili ye mikuswani, Bibele i bulezi ona cwalo, ku lapela mwahala batu ni toho ya hae inze isi ka apeswa. Mi ni za hae...

Oh, mubulela kuli, “Na tinanga kuwanî.”

¹⁵⁴ Wena muipi, mulute basali bani lika ze cwalo zani! Kanti, Bibele iize, “Milili ya hae i filwe ku yena kuba siapalo,” isiñi

kuwani yeñwi ye pangilwe ki mutu. Sani kona se ne i bulezi Bibebe. Na hanina mulatu; Ni na ni fela buikalabelo kuli ni bulele Niti. Musike mwaba baba sa sepahala, sina Bibebe ha i bulezi kuli, "Kuswala Linzwi la Mulimu ka buhata," ku—ku lukisa kamba—kamba kufita ku ze tok wahala za sikhwata sa ma ricketta.

¹⁵⁵ Ni na ni linzwi lakuli *bumaswe* fa. Ni na ni "Elvis" le liñozwi mwa sibaka sa *bumaswe*. Kaufela zona liambola ze swana. Linzwi lelili *Elvis* litalusa "kaze," mi linzwi lelili *Ricky* litalusa "peba." Ha mubulela kuli "Ricky yomunyinyani," mu talusa, "peba yenyinyani." Se mu mubiza, sani kona sali sona. Mwana mina ubeilwe libizo lani, mu li cince kapili, ka bakeñisa Evangeli. Musike mwa beya libizo mwana mina . . .

Ha mu sika utwa kale mabizo a cwalo kwa mulaho mwa Bibebe, kamba mwa lusika loluñwi kaufela. Ki lusika, libizo la lusika lo. Ko kukile kwaba lipeba ni likaze ze lyangani, ki kwani.

¹⁵⁶ Ni ze . . . ? . . . ma dollar a lule a libapaliso, mi banana ba ha ba zamaya kwanu, mane ba palelwa ni kuya kwa—kwa sikolo kusina sika mwa lizebe za bona, ni ka wayalesi nyana mwa lipokoto za bona, fela ki, "boom-de-boom."

Oh, ba taha kwa ndu kwani, mi lwa eza . . . Micaha bani neba lika kupenta ndu yaka kwani. Se luli, "Mutubule lika zani muli beye kafo. Haiba ha mukoni kubeleka kusina sani, konakuli muitulele musebezi. Li ni ezanga hahulu ya ikalelwa mane ha Ni koni nihaiba kuyema bukaufi fa. Lufile sibaka se ku Mulimu. Halu tabeli mufuta wa bukuba bwani wa boogie-woogie bukuba bwa mazazi a maungulo aliteni a." Se nili, "Mu si time kamba mutuhele ku sebeza!"

¹⁵⁷ Mulemuhe, bulapeli, niteni, oh, luli, bayá kwa likeleke ni ku yo yema mwa tuyaho, banze ba teeze kwa boogie-woogie.

¹⁵⁸ Hape, mulemuhe, Munyaliwa wa Linzwi wa Kreste uya a pahama, ni yena. Sina ha lubona ko kuya antikreste inza pahama, na kalezi kwa mulaho kwani mi fa u zamaela kwa toho; katengo ka swaliso ka ka litisa kwa toho ya za bulapeli. Mi ni Keleke ye nyinyani ye nze i taha, ni yona, Munyaliwa wa Kreste wa Linzwi ubile ataha mawahala lusika, usweli kutaha kwa Toho, kakuli Uka swalana ni Muhabo Yena. Kamita, kuswana fela sina keleke ni lika zeñwi kaufela, Ika swalana. Buloto, lika zeñwi kaufela, za taha kukuta kwa toho ya zona ko ne likalezi; sina Kaine ni Abele. Munyaliwa wa Linzwi uka taha kwa toho ya Mutu wa Linzwi la Mulimu leli bonahalile mwa lusika lolu maswe mo lupila mo. Mwabona ko liya lifelela kana?

¹⁵⁹ Mi Satani cwanoñu u kanga munyaliwa wa hae wa ngana ya butu ni ku mu pahamisa, yali yena antikreste, wa mundandwe wa litulo, ni ku mu beya fa lubona, "mi lifasi kaufela li ka mu komoka."

Mi kipeto Kreste uka taha. Mi bababeli habakoni kupila ka nako yeswana. Mi mubuso wa hae uka zuswa; uka sinyiwa.

Mi Kreste, ona Linzwi la Mulimu... Kakuli, musali ki siemba sa mubili wa muuna. Ha ki bababeli; ki alimuñwi. Mi Munyaliwa, Keleke, Linzwi, “sicaba se si bizizwe kuzwa *kwanu ni kwani*, ka bakala Libizo la Hae,” ba ka swalana mwa Mubili wa Jesu Kreste.

Mi mubuso wa antikreste uka zuswa ni ku sinyiwa. Mi Kreste uka amuha lubona, ni kuina fa lubona lwa Ndatahe Davida, ni kubusa fa lifasi ka myaha ye eza sikit; mi kona akatisa Keleke ku Mulimu, “yesina litiba kamba kunyazahala.” Eeni!

¹⁶⁰ Cwale mulemuhe milili ya hae ye mitelele, buitamo bwa si Nazareni kwa Linzwi. Ni ka swanisa Munyaliwa wa Kreste cwale. Lwa swanisa antikreste, ko afumaneha, bulapeli ni lika kaufela, sayansi. Cwale Munyaliwa yomunyinyani wa Kreste ya ikokobelize yena wa lumela Linzwi ka bunolo, yo kaufela ali Yena. Ki mutu ku yena anosi. Na lumela ni ku sepa kuli kuna ni babañata babainzi mwahali mo, babañata ba sweli kuteeleza. Mi Ni sepa kuli na kasibili, mi ni mutu kaufela wa mina, mu siemba sa Munyaliwa yani. Na sepa babañata. Mi, kukaba cwalo, kaufela baba lelezwi ku zani bakaba cwalo, kakuli ki sibupeho sa bona. Ba bona. Linzwi likona fela kulemuha Linzwi. Ha likoni kulemuha kopano kamba kulyangana. La ziba hande; Ki Linzwi. Mwabona? Ha likoni kulemuha lika zeñwi fela . . .

Buloto habukoni kuba sika sisili kwanda kuba buloto. Ne bu kalile, buloto; buka fita kwa toho, ya buloto. Mi bucwani ha bu koni kuba buloto, ibo bu selaelwa ka tozo yeswana. Mwabona? Kono haki buloto. Sina hane Ni bulezi zazi leliñwi, ka za kota yena ni mitai ye shutana ku yona.

¹⁶¹ Milili ya hae yemitelele, buitamo bwa si Nazareni, si bonisa kuli Uipile kwa buitamo ku Mulimu. Mukanjo wa hae wo munde wa Linzwi la Hae leli sepisizwe mwa lusika lo Apila ku lona, utatelizwe ku Yena, kubonahalisa Musali ni Yena, ka Maheberu 13:8, “Jesu Kreste ya swana maabani, kacenu, ni kuyakuile.” Sina, Yena hali siemba sa Munyali wa Linzwi, wa sephahala ku Yena mwa litaba kaufela.

¹⁶² Cwale a mutualime. Haiba musali uya kwande kwani mi u nyalwa ku muuna, mi uwewla kwande ku yo lobala ni muuna usili mi uba ni silikani ni yena, ni kukuta ku muuna hae, ulukela ku mu lahela kwande. Kana ki niti yeo nji? Ulukela kuba wa niti ku yena, kakuli u tamilwe ku yena.

Mi Munyaliwa wa Kreste utamehile ku Kreste; mi Yena ki yena Linzwi.

Hakuna nihaiba kuinamela kwa neku leliñwi, musali halukeli mane nihaiba ku inamela muuna usili. Halukeli kueza mikwa ni yekana, kutokwa nihaiba maikuto afi kaufela ku

muuna, kakuli yena ka kufelelela ki munyaliwa ku munyali alimuñwi.

¹⁶³ Luna halu tabeli nihaiba iliñwi ya likota za mina ze kopani kopani, likopano za mina. Mube ba niti ku Kreste, yena Linzwi. Uka Li paka kuba la niti. Batili, sha, isiñi mane nihaiba maikuto a sika kaufela abonisa kueza boozwa ku yena, musike mwa kena mwa likalulo za hae, kamba ku mutuhelela ku mi beya mwa mazoho a hae kamba pabalelo ya hae, kamba—kamba kubulela ku mina ka nzila *ye*, nzila *yani*.

Mu teelezange fela kwa Linzwi lililiñwi. “Lingu za ka liziba Linzwi la Ka. Mueñi halina ku mu . . .” Kana Linzwi la Hae ki sikamañi? Muhuwo wa mutu kaufela ki linzwi la hae. Mi se ki Sona, yona Bibebe, hakuna linzwi leli lukela ku ekezwa ku Lona kamba kuzuswa ku Lona. Muine fela hande ni Linzwi lani. “Mueñi fela halina ku mu latelela,” kopano.

¹⁶⁴ Sina, Yena ki siemba sa Munyali, wa sepahala ku Yena mwa litaba kaufela, ulibelezi Sinawenga. Ku tamahana, isiñi kwa katengo ka ba swalisano; kono mwa mbyumbyulu, kwa Mulalelo wa Sinawenga. U filwe . . . Se ki sa keleke ya luna fela. Ona . . . U filwe kale, ni ku patulula ku Yena, likunutu za Maswayo a Supa a Bibebe. Mwabona? Wa bona bukuba bwa mupumi, ka kusutelela hahulu bukaufi kwa Niti, kuli mane libata kupuma ni bona ba Baketilwe. Wa li bona. Una . . .

¹⁶⁵ Mwabona mioya ye lwanisana yemibeli ha i beleka mwa lusika lolu maswe lo? Kana mwa i bona? Omuñwi ni omuñwi ki wa bulapeli, Kaine ni Abele, mioya hape i taha kwa litoho za yona, isali yeswana sina mo ne i kalezi. Ulimuñwi, ku lapela ka bunde, ni ka zibo, ni ka tuto, ni ka sayansi, ni ka lizo. Mi haili Omuñwi, ka tumelo ya sinulo ya Linzwi la Mulimu. Sibeli sa yona iyemi ona mwa muyaho wo kakusasana cwana. Yani ki niti.

¹⁶⁶ Sinulo, kamba tumelo, mwa Linzwi la Hae, hakuna kuipapata ni kulikuñwi kwa zibo; ku wa niti, Mukreste wa niti.

Ba bulela kuli, “Kana una ni—una ni digiri ya buluti nji?”

Hakuna kuipapata ni kulikuñwi. “Na—Na lumela Linzwi la Hae.” Mwabona? Hakuna kufa buipapati ni bo bukaná. Haipapati kuli uitutile. Ha ki wa siemba sa kopano kaufela, katengo kaufela, kalulo kaufela. Ki ya Kreste. Ki Musala Hae; ha ki musala keleke.

Ki lihule. Bibebe i bulezi kuli nali “lihule,” ni, “MAHE WA MAHULE,” mi kaufela bona bahula hamoho mi baba lihule leli swana. Mi mufuta wa musali ya cwalo yani ki ya sina niti ku Muuna hae; mi uipapata kuli Kreste ki muuna hae, kanti ukwa siemba sa kopano. Bukuba bo bu cwalo! Luna lu ba Kreste.

¹⁶⁷ Kono, ka ku utwela, yena Musali yomunyinyani wa tumelo yo, ya pila ka tumelo, yena Munyaliwa; mutu wateni *fa*, *fani*; kwanu, kokuñwi kwa sibaka sisili, keleke yeñwi, kopano yeñwi

cwalo, seo kaufela sili sona, mwa mukwa omuñwi... Wa lumela Linzwi la Mulimu, wa li utwela, ku libelela mwa lilato, kwa sepiso ya lusika kuli italelezwe. Usweli wa libelela. Yena ki siemba sa Linzwi lani, mi Unza libelela kuli bupilo bwa Hae bu bonahalise Linzwi lani.

Bana bahesu, kana hamuboni sani? Na sepa sani ha si sika mi fita fa halimu.

Mubili ulibelezi (ili lona Linzwi), ulibelezi Bupilo (yeli ona Moya) kupaka kamba ku Li bisa le lipila. Sani kona Sa libelezi. Hakuna bupilo busili bo bu kona kubeleka ku Yena. Hakoni kutaha kwa bupilo ka nzila isili kaufela. Ibo, Uikutwa inge kuli kwande kwani, mi Wa ziba kuli ku ka ezahala; kipeto za ezahala, kipeto Wa zuha. Mulimu naize, “Ha kube sakuli,” mi Sa taha sina wa pili mwana tezi.

¹⁶⁸ “Bana baba sa utwi” kutalusa ku utwela... *Kusautwela* kutalusa “kukwenuha.” Ni balile sani mwa buka ya litalusa za manzwi, kuli ni ikolwisise. Kukwenuha, ku kwenuhela (sikamañi?) lona Linzwi leli patuluzwi la Mulimu. Sina Kaine hana patuluzwi...ku kwenuhela sinulo ya Abele ye patuluzwi, kupakiwa ki Mulimu kuli ne ku lukile. Mi Kaine a li kwenuhela, mi a bulaya munyana hae.

Bafalisi, ka zibo ya bona ya likopano ya seo Linzwi la Mulimu nelili sona, mutu ya ketilwe ya nopolwe ka lizoho, ku kwenuhela Linzwi lelipakilwe la Mulimu mi le li bonahalile mwa lizazi lateni, Jesu Kreste, mi a Mu bulaya. Yani ki niti?

Bani ki bona “bana ba bahanyezi” ki, kuhanyeza ku kwenuhela Linzwi la Mulimu.

Cwale kikuli mwabona fo ba inezi? “Oh, mazazi a limakazo a felile. Jesu Kreste ha swani ni hanyinyani. Hakuna taba ya kuli kolobezo ya Moya o Kenile. Liki zani kaufela ki bukuba!” Mwabona, kukwenuha! Ha ba lukeli kubulela lika zepeli; ba lukela fela kubulela hañwi, ku felile. Kwani ki ku kwenuhela, ona kwani. Ha ba koni kubulela kuli hamuna meto, hamuna mazebe; mu lukela kunga mubili ka kutala, lona Linzwi ka kutala. Mwabona?

Pizo ya Moya o Kenile, “Muzwe ku yena, musike mwa i kabela kwa lituto za litumelo za kopano ya hae,” ha na nza seha ni ku keshebisa Linzwi la Mulimu la lizazi le.

“Kakuli Mulimu ha somiwi,” muhupule fela. Uka i kungela zona. Musike mwa bilaela. Uka i kungela zona. Bibele, mwa Maefese 4:30, haiba mubata ku iñola yani, Maefese 4:30, iize. “Mulimu ha somiwi. Sa cala mutu kaufela, ki sona hape sa ka kutula.” Habakoni ku soma ni kueza lisheha, ni kubulela lika ze, ni kuya mutakafululele ka zona. “Sina sinkwa fa mezi, li ka kuta.”

¹⁶⁹ Ki munyaliwa wa diabulosi, kutatezwa mwa bulapeli bwa hae, zibo ya kulata sibi ya lusika lwa kacenu lolu maswe lo, ku mi puma. Oh, mawi! Sikwata kaufela kamba kopano ya mioya ye puma, ka zibo ya sayansi ni zwelopili ya kacenu! Kuipapata . . .

Lu ka kwala mwa mizuzu fela ye likani. Ni ka tuhela, kakuli ha Ni koni ku lifeza kaufela lona, mwabona.

Kuipapata kuli usweli ku yaha lifasi lelituna la mina kuli mupile kulona. Wa i papata, kuli, mwa zwelopili ya hae, u yahile likeleke zende, likoleji, likolo, lipatela, miyaho ya libuka, ni tuso ya swalelele ya mutu, kusina Linzwi la Mulimu. U ezize cwalo. U bonisize kuli wa kona kueza sani. Mi sicaba siwezi ku zona; eeni, sha; likolo, likopano, sizo, batu ba batina hande, batu ba baca hande.

Ne ni ka tabela kuba mwa mukoloko wa kuamuhela sinkwa, ni kuba ya lukile ni Mulimu; kufita kuba ni kuhu ye halikilwe halalu ka zazi, mi ni be wa siemba sa lihule leli cwalo.

¹⁷⁰ Muhupule, hola se i sutelezi fo nombolo ha ika taha. Mu ka ba ku yona kamba kwa nde ayona. Ika taha sina lisholi mwa busihu. I ka mi swasa mwahali mwani, mi muteni mwani. Hakuna ku konahala kuzwa mwateni ka nako yani; mu se mu i amuhezi. Muzwele kwande!

Lingeloi neli tile kuzwa kwa Lihalimu, ni sifateho se si benya ka butuna, mi la huwa kwa sicaba. Ne li nyanganyize lifasi. “Muzwe mwa Babilona, kakuli u wile. Mu si ke mwa i kabela kwa likoto za hae, sicaba sa Ka!” Muzwe ku yena. Muzwele kwande! Kana ne lu si ka bala cwalo mwa Linzwi, fa nako nyana? Kuli *lingeloi* ki “numwana,” mwabona, ya taha. Mulemuhe Moya o Kenile, “Muzwe ku yena, kuli mu si ke mwaba ni kabelo.”

¹⁷¹ Cwale uyahile lika ze kaufela. Uyahile likeleke ze tuna. Uyahile koleji, likolo, kunga batu ni kuba luta mwa—mwa bunde, bwa zwelopili, mo ba ibizeza. Mi baba lutile ka zwelopili ya kacenu ye ba tisize mwa musima wa lifu, ka zibo, kwahule ni Mulimu ni Linzwi la Hae.

Kana hamuboni mulelo kaufela nji? Kikuli mwabona sani, keleke? [Puteho ili, “Amen.”—Mu.] Kwande fa moyo, haiba mwa li bona mwa puteho ya mina bañi kafoo, mubulele kuli “amen,” baba siyezi ba bona kaufela baka ziba fo moyemi. Mwabona?

U ezize cwalo. Musali yo . . . Ki mulimu wa lifasi le, mi uyahile likoleji. Uyahile likolo ze pahami za yuniveziti. Uyahile lipatela. Uyahile miyaho ya kubulukela libuka. Uyahile lika ze kaufela ka tuso ya swalelele ya butu, ka buñata fela kuli a ba pume, kuli bazwe mwa Linzwi lani. Mi ubaisize kwa sikamañi? Keleke ya lifasi kaufela ikeni mwa lifu, kakuli Mulimu nabulezi kuli Uka cisa lihule, ni bana ba hae, ka mulilo wa kamita.

Muzwe ku zona, sicaba! Musike mwa swaseha mwani. Mu sabe kwa lika zani kapili mo mu konela!

Ka zibo ya hae ya sayansi, ukonile kueza taba ye, cwale mulemuhe, kusina Linzwi la Mulimu.

¹⁷² Mulimu na si ka toma za ku ya kwande ku yo yaha likolo. Ali kuba. Ali kuba alu bulelele ku yaha lipatela. Ki zende. A si ka lu bulelela kuli lu yahe miyaho ya kubulukela libuka. Batili, sha. Ali kuba.

Na ize kuli, “Mukutaze Evangel.” Mi, Evangel, ki ku bonahaza, ku bonahaza mata a Moya o Kenile.

Paulusi naize, “Evangel itile ku luna, ha ki ka linzwi fela, kono ka kubonahalisa kwa Moya o Kenile.” Paulusi naize, “Hani si ka taha ku mina ka manzwi amatuna a butali ka muituti yomuñwi wa zeñwi cwalo, kono Ni tile ku mina ka ponahazo ya Moya o Kenile; kuli tumelo ya mina isike ya tiyela mwa butali bwa batu ba lifasi le, kono mwa mata a zuho ya Jesu Kreste; kakuli Wa pila, yena ya swana maabani, kacenu, ni kuyakuile.” Mulimu alu tuse ku lumela taba yeswana, mi Mulimu apake lika zeswana sina Ha bile aezanga cwalo.

¹⁷³ U mi beya kwa kutokwa kubona sinulo ya niti ni tumelo ya Linzwi la Mulimu ha i patululwa ni kupakiwa kacenu, ka likolo za hae, miyaho ya kubulukela libuka, libuka, lipatela, ni zeñwi cwalo. Mwabona? Wa mi beya kwahule ni zona. Yena cwale usweli ku toloka, sina mwana ezelize ku Faro, kulika ku mi paleliswa kubona taluso ya Linzwi le li pakilwe la sepiso ya lusika lwa Hae mwa Liseli la manzibwana, kupakiwa ni ku nyatelwa. U likile, ka zibo ya hae, ni likolo, ni sicaba se si itutile hande, ni lizo, ni zeñwi cwalo, kuli mutokwe kubona Zani.

Sika kaufela, kuli musike mwa talima ku Sani ni kubona kuli yani ki Jesu Kreste! Kana muziba cwani kuli ki Jesu Kreste? Ki yena Linzwi, mi ki Yena Linzwi la lusika lo. Mi lusika lo, ne ku bulezwi kuli lika ze lika ezahala mwa lusika lo, mi ki ze fa za ezahala. Mwabona? Mwabona? Ulika ka tata kuli mutokwe kubona Sani.

Uka beya libizo la masila kaufela Fateni mwa konela. Mwabona? Uka Li biza kuli “bapikuluhi baba kenile” ni lika zeñwi kaufela. Na bizize Jesu kuli “Balezebubi.” “Mi haiba babiza Muñaa ndu kuli Balezebubi, kana ba ka biza cwani balutiwa?” Mwabona?

¹⁷⁴ Mwabona, Kulika ku mi tokwisa kubona taluso ya luli ya Linzwi. Isiñi sani... Mwabona, usweli wa Li toloka, kubulela kuli Li talusa *se*.

Mulimu naize, “Ni sejisize mwa mazazi a maungulo kuli Ni ka mi lumela Malaki 4.” Ha si lukeli ku tolokwa; Na ezize ona cwalo. Na ize, “Mi sina mo ne ku inezi mwa mazazi a Lota, lifasi likaba mwa buino bwa Sodoma; mi mwa nako yani, Ni ka patulula Mwana mutu ka sona, hande.” Luna ni mifuta kaufela ya malikanyiso ni zeñwi kaufela, za teni, kono luna ni Wa niti, ni luna. Mwabona? Na ize kuli Uka peta cwalo.

Na bulezi kuli antikreste uka taha mane apume ni bona ba Baketilwe haiba kwa konahala. Kono abulela kuli, “Mu ba tuhele banosi. Mu ba tuhele bazwelepili. Bukuba bwa bona bu ka zibahala.” Kiñi? Tatubo ya Linzwi ya li paka. Mwabona?

Ha i fita fa Linzwi lani, “Sani se ne sibile kwani ka mukwa *wo, wani?* Oh, Hani lumeli mwa peu ya noha. Hani lumeli ku *ze, zani, ni zeñwi.*” Hali si ka patululwa kale, mwabona, batili, kutokwa. Oh, muzwale, mutualime fela kwani . . .

Lu ka tuha lu kwala, kakuli seli twelufu kiloko.

¹⁷⁵ Mulemuhe, ulika ku mi eza kuli musike mwa bona taluso ya Linzwi la lusika lo, ya Liseli la manzibwana ha li tolokwa. Ki kuli . . . Kana si talusa nto mañi? Seli nako ya kututa i sutelezi, Mulimu wa Mutela, ka ku sepahala sina lifasi. Mwabona?

¹⁷⁶ Cwale Ni bata ku mi buza puzo. Haluse, ki twelufu kiloko cwale, mizuzu iketalizoho kasamulaho; kipeto lu ka zwa, busihu bwa kacenu. Kana mwa bona mulimu wa lusika lo nji? [Puteho ili, “Amen.”—Mu.] Kana mwa lumela? [“Amen.”] Mwabona mo si inezi, ki keleke, ya ngana ya baituti, ba sayansi?

Lifasi kaufela ki la siemba sa teni, mwabona, ki likopano. Mi, mu li, “Ni Mukreste.” “Ki kopano ifi ye mu ipumana ku yona?” Kihande, kambe Ne nili wa kopano, Hani sepi kuli Ne ni kaba Mukreste. Cwale, lani ki linzwi lelituna, kono yani kona niti.

Ni zwezipili fela kubulela kuli zibo ni sayansi, ni Bukreste, halina tamahano ni hanyinyani. Yeñwi ki ya diabulosi, mi yeñwi ki ya Mulimu. Sika kaufela se si latula Linzwi la Mulimu, mu be kwahule ni sona. Mwabona? Batili, sha. Bibebe ya biza, mwa mazazi a maungulo a, kuli Bakreste bazwe ku lihule lani, yani ki kota ya bunde ni bumaswe.

¹⁷⁷ Luli, una ni bunde. Kana kuna ni ya kona kubulela bumaswe ka sipatela? Batili, sha. Muyaho wa kubulukela libuka? Batili, sha. Tuto? Batili, sha. Kono, mwabona, ba bafa lika zani kusina Linzwi. Mwabona mo li bezi ze puma? Ku bafa keleke ya kuya kwateni, mulapelo wa ku lapela, “ki mulimu ya inzi fa lubona.” Bibebe i bulezi kale za teni.

¹⁷⁸ Cwale mu ba siemba sa iliñwi ya mibili yani. Kuna ni fela bababeli ba bona mwa lifasi cwale, kamita kubile cwalo, mi ku ka ba cwalo kufitela Jesu ataha, mi alimuñwi wa bona uka sinyiwa. Cwale mu ba siemba sesiñwi sa mibili yani. Iliñwi ya ku bona, mu ikopanyize; haili yomuñwi, mu pepilwe ku Lona. Mwabona?

Alimuñwi wa bona, mu siemba sa teni kakuli mu pepilwe mwa Teni. Mu lukela kuba siemba sa Lona. Kana Ne ni ka latula kuli Ni na ni lizoho? Kuswana sina ha Ni sa koni kulatula Linzwi la Mulimu kaufela, haiba Ni wa siemba sa Mulimu. Ni siemba sa William Branham; Ni inzi mwa likalulo, mi kalulo kaufela ki kalulo ya ka. Mi Linzwi la Mulimu kaufela lina ni ku kwana

mwa moya waka, lina ni ku kwana mwa moyo wa ka, lina ni ku kwana mwa bupilo bwaka, Li na ni ku kwana minahano ya ka. Haiba njii mihipulo ya ka ya shutana ku Lona, konakuli Moya wa Mulimu ha upili ku na. Yani ki niti. Hanikoni kulatula Linzwi ni le likana la Teni.

¹⁷⁹ Mu ba siemba sesiñwi sa mibili. Mu lukela kuba, sa lukela fela kuba. Ikana ya ba kuli ki Mubili wa Mulimu, oli ka Linzwi; kamba ki mibili wa Satani, ka keleke. Mi lifasi kaufela li ka tokwa kuba la siemba sa keleke yeñwi; lika lapela balimu babañwi. Mu na ni ku lapela mulimu wa zibo, muiteinga ku se muutwa ka zibo, muiteinga fa halimwa *se*, kamba *sani*, kamba *sesiñwi*; kamba mu ka itinga fa Linzwi la Mulimu, ka tumelo, ku Mu libelela kuli a Li taleleze ni ku Li eza kuba la niti.

Keleke ya niti ya Mulimu i libelezi kutaha kwa
lizazi la tabo ya Mileniamu lani,
Fani Mulena luna ya fuyozwi ha ka taha ku to
ngela Munyalawa wa Hae ya libelela;
Oh, pilu yaka itezi tabo ha Ni nze ni sebeza,
kutona ni ku lapela,
Kakuli Mulena luna wa taha mwa lifasi hape.

Oh, Mulena luna wa taha mwa lifasi hape,
Satani uka twamwa ka lilimo ze eza likiti,
haluna kuba ni muliki ka nako yani,
Kasamulaho Jesu amano taha mwa lifasi hape.

¹⁸⁰ Oh, sicaba sa United States ye, ko ku sweli kuya Liñusa le cwale, musabe ka tata mo mu konela kuzwa kwa zibo ye, lusika lwa sayansi lo lu pila ku lona. Mu sabei kwa Linzwi la Mulimu!

Mina, Na, hakuna yakona—yakona, ya ziba ka Zona. Hakuna yakona ku Li nyakisisa. Mulimu wa linyakisisa Iliyena Kasibili. Hakuna yana ni tukelo yakuli a Li toloke; na, hakuna mutu yomuñwi yana ni tukelo. Mulimu wa Itolokelanga Iliyena Kasibili. Na file sepiso. Na bulezi kuli Uka eza sakuli mwa mazazi a maungulo.

Mi mwa mazazi a maungulo mulimu wa lusika lolu maswe lo uka foufaza meto a sicaba, ka zibo ya hae ya butu, kwa kota ye kopanezi bunde ni bumaswe, u sa ifa kwa sicaba. Mi fa kutaha, sika sani sitaha kwa toho, kopano yani kuzwa kwa mulaho kwani mwa Linako za Lififi, mi ku sikaba kale Linako za Lififi, kaufela zona lifelela ku mutu ya ipitezi, Satani, yana ize, “Ni ka ipaheka fa halimwa bana ba Mulimu, mi baka teeleeza ku na.” “Mi yena sina Mulimu uka ina mwa tempele ya Mulimu, mi bana ba Mulimu baka wela ku zona.”

¹⁸¹ Kiñi, mwana Mulimu, uli, “Kihande, musala ka, ha ki; ki yomunde . . .” Zwelapili cwalo, zamaya fela kwapili. Mwabona?

Mu li, “Kihande, Na ize ‘bana ba bashimani ba Mulimu.’” Eeni, sha.

Muuna, yo kaufela ali yena, na bupilwe mwa sibupeho sa Mulimu, kwa kanya ya Mulimu. Mi musali ki sibupiwa sesi zwile ku ze bupilwe za muuna, isiñi ku Mulimu. Ki niti. "Fani bana ba bashimani ba Mulimu hane ba boni bana ba basizana ba batu kuli neli babande, ba i kungela bona bañi basali."

"Mi sina mone ku inezi mwa mazazi a Nuwe, kona mo ku ka bela fa kutaha kwa Mwana mutu."

Cwale mutualime, haiba mu bata kuziba kalulo fo i zamaela keleke, mutualimele kalulo fo kuinzi basali, mwabona, kakuli ki yena keleke. Mutualime sa sweli kueza, mwabona, mi ni mwa lusika lo lwa buhule.

¹⁸² Mutualime, neku sikaba kale wa pilu seta, ya maswe, muipi, muleneñi wa buhule mwa lifasi, kufita Nazareta, mi kuzwa mwani Mulimu a keta mwalyanjo. "Kana kuna ni sika sesinde se si kona kuzwa mwa Nazareta?"

Mi kuzwa mwa lusika lolu maswe lo, ili ko mulimu wa lusika lolu maswe lo a foufalyze meto a sicaba, ka lituto za litumelo za bona ni likopano; kuzwa mwahala ona lusika lwani, Mulimu usweli wa keta sicaba sa Libizo la Hae.

Ni ha ni ka kendwa fa ni ku keshebiswa, zazi
leliñwi Mulena uka tisa

Baketwa ba hae mwahala munyako, mi sani sa
likana lika kaufela.

Mi luka opela ni kuhuwa, ni kubina bina,
Ngunyana uka takula mioko ya luna;

Lukaba ni sunda iliñwi ye kanya ya kukuta
kwa hae,

Lilimo zapili ze likiti. (Yani ki niti.)

Sicaba sesinde sa Libizo la Hae mi si bizwa
Munyaliwa wa Hae. (Ki niti kana?)

Ni ha ni ka kendwa fa ni ku keshebiswa, zazi
leliñwi Mulena uka tisa

Baketwa bani mwahala munyako, (mwa
kututa) mi sani sa likana lika kaufela ku
na.

¹⁸³ Ni ya ni supala. Mi mazazi aka akala kufela; mi meto aka akala kuunda; mi lumonyi nyana lwaka lwa bupilo se lukala kutukela mwatasi. Ha ni sabi lififi. Kakuli Ni bata kubulela cwana, ni Paulusi, "Na Mu ziba mwa mata a zuho ya Hae." Hakuna taba kamba baka ni pumbekela kai, haiba Ni ka tiba mwa liwate, kamba kuca mwa ondo ya mulilo, kamba ku ciwa ki tau, Uka biza libizo la ka, mi Ni ka bulela. Amen!

Halu lapeleni.

¹⁸⁴ Haiba kuna ni mo, kamba kwande fa moyo wa Liñusa le mwahala naha, mwa likeleke za mina ze nyinyani ni likwata ni miyaho, ni kafoo kaufela ko muinzi, haiba kuna ni alimuñwi, oh,

mutuhele kuli ni mi susueze; ni mi kombelele, kakuba mubuleli wa Evangel; mutuhele ni mi kombelele, ka Libizo la Jesu Kreste; musabe kwa buhali bwa lusika lolu maswe lo! Musike mwa sebeleza mulimu wa lusika lolu maswe lo.

Oh, Na ziba mubulela kuli, “Ku hande. Ki babande.” Luli, ki kota ye kopani kopani. Hamukoni ku kopanya zibo ni Linzwi la Mulimu.

Ki Linzwi leli lukela ku lumelwa ka tumelo, isiñi zibo. Ha mu Li utwisisi; mwa Li amuhela. Mu li Ki la niti, mi kipeto mu pile ka Lona. Kipeto kona Za mi kupa fela kuli mueze.

Haiba kuna ni yomukana ya liteni mo mwa sirkwata sa luna, halukoni kubizeza batu kwa pili kuli lu mi tise ni mina kwanu, kakuli hakuna sibaka se si tuna; kamba kwande kafo fa moyo, fa mihala ya mawaile, haiba nji kuna ni yomukana kwande kafoo ya sa Mu zibi. Musike . . .

¹⁸⁵ Oh, basali, Ni mi halifezi kakusasana cwana, haki na, Ni balile fela Linzwi. Milili ye mikuswani, kutina tuapalo totu kuswani twani, ku apala ka mubonahalelo wa butanya luli, kana ha mu lemuhi kuli moyo wani . . . Wa kona kuba ya kenile, kezeli, mulatiwa, ha i fita kwa mubili wa hao, kono mwa moyo wa hao kana ha uboni se si ku sweli?

Kikuli Mulimu uka eza mwana Hae wa musizana ku bonahala butanya kuli apume mwana Hae wa mushimani, kuli a mu lakaze, kuli sibeli sabona ba yo alaba ka boozwa? Kikuli Wa kona kueza cwalo, kezeli? Ipuze wena muñi puzo yeo. Batili, hakukonahali nihaiba ka limaele ze eza bo lule baba lishumi. Usike wa beya sani ku Mulimu.

¹⁸⁶ Muzwale, kana mulimu u ku file moyo wa lifasi le kuli ha u sa boni kuli sani si fosahalile? Kana u ku punyize meto a ahao, kwa lizo za keleke, yona kopano, lituto za litumelo, ni zeñwi cwalo, kuli haukoni kubona kuli Mulimu usweli wa taleleza Linzwi la Hae ni ku Li panga kuba cwalo? Kana ki musebezi wa hao, kana ki mulena hao kwa musebezi, kana ki musala hao, kana ki bana ba hao, kana ki keleke ya hao, kamba sika kaufela, se si ku kauhanyize kwa Linzwi la Mulimu, yeli fela ona makalelo a Bupilo? Saba ku zona, muzwale waka! Na ku lata, ka lilato la bumulimu. Ha ni kuteki nihaiba alimuñwi wa mina mizwale baka fahalimwa mina, batili kutokwa. Kambe Na eza cwalo, Ne ni ka bonisa likute la butu. Hani buleli lika ze kuli ni mi nyemise. Na bonisa, ni bulela lika ze kakuli lifumaneha mwa Linzwi la Mulimu. Mi kakuba mutanga Mulimu, ni lilato la Mulimu mwa pilu yaka, Na mi bulelela lika zani kuli mu bone ni ku utwisisa. Mwendi ne musike kuziba kambe ha Ni si ka mi bulelela. Kana mu ka li saba kacenu?

Cwale, kai ni kai kaufela mwahala naha, halu inamiseni litoho za luna.

¹⁸⁷ Mulimu yomunde, fapila ka kuna ni litaulo. Sicaba sa kula; Ni beya mazoho aka fahalimwa zona, kuli Uba folise.

¹⁸⁸ Mi Na sepa, Mulena, busihu bwa kacenu, kuli ku ka ba sebelezo yetuna, kuli Mata a Mulimu akaba mo, limakazo zetuna ni ze komosa. Sina ha lu utwile linepo kuzwa mwa mikopano ye mibeli yefelile, ki butuna cwani, kubona sene si ezahalile! Na lapela, Mulimu yomunde, kuli Ulufe kalulo ya liemba zepeli busihu bwa kacenu. Ni lapela cwalo ka pilu ye sepahala, Mulena, kakuli ki lilato laka ku Wena ni Linzwi la Hao, ni kwa sicaba se. Lumeleza cwalo, Mulimu yomunde.

¹⁸⁹ Mi haiba kwande mwahala naха, kamba nihaiba mwahali mo cwale, kuli kuna ni babaňwi ba bakula mi ba zielehile, mi balukela ku latelelwa busihu bwa kacenu, mwendi ha ki mo, kamba kuba kwande kwani mwa likeleke kamba libaka ko ba kopanela; Ni lapela kuli Uba folise. Cwale, Mulena, kono kwa foliso yetuna kufitisisa! Haiba Uka folisa mibili yabona ya butu kuzwa kwa kansa, TB, katabi, sesiňwi, baka kula hape, hakuna kukakanya, haiba baka pila nako yetelele, kakuli mibili yabona isali mwataswa sibi, ona sikuto. Kono tuhela kuli bange yona—yona foliso ya luli ya Bumulimu, foliso ya moyo, ye panga sibupiwa se sinca, kuzwa kwa lifu kutaha kwa Bupilo, mi kipeto ni ku libelela mwa tabernakele ya kale ye kwa kuliululwa kwa mibili kasamulaho moyo umano liululwa. Lumeleza cwalo, Mulena.

¹⁹⁰ Mi ha ba sabe kuzwa mwa likopano ni lituto za litumelo. Mulimu, kwahule kwani mwa lituto za litumelo ni likopano Ni kopani ni mizwale yemiňwi yeminde. Mi, Mulimu, kana Ni kona kubulela cwani kuli ba li bone, mi ba kone kubona Linzwi? Sa ni bilaeza. Kono Na ziba, hape, kuli No ize, “Hakuna mutu ya kona kutaha,” hakuna taba kamba ki yomunde cwani, ka mwa bezi ya ishwile, mwa bezi ya ikokobelize, “kwanda kuli Ndate A mubize. Mi kaufela Bao Ndate ba Ni file, ba ka taha.” Mi, Mulena, Ni i kutwa kuba yana ni musebezi tuna wa kubulela Niti.

Mi isiňi sina Paulusi hana bulezi, “Kuswala Linzwi la Mulimu ka bupumi,” ka lituto za litumelo za likopano ze zwakani ni Lona, sina kota ye kopani bunde ni zibo, bunde ni bumaswe; kono ka pilu ye kwaluhile ni Moya o Kenile. Lumeleza cwalo, Mulimu. Upilise mutu kaufela.

¹⁹¹ Cwale ni litoho zaluna ze inami ni meto a itimile. Mi isi ku na... Hanikoni kubulela ka nzila ye, “Ha si ni pangí ku shutana kamba mwa eza kamba kutokwa.” Sa ni panga shutano. Na mi lata. Mi Ni sepa kuli ha mu nahani kakuli ha Ni lukela kubulela ka buhali... Sina Paulusi hana bulezi kuli, “Ne ni ka tabelia kuli ni be ni mina, mi Neni ka cinca maikuto aka.” Ne si kuli na sa ba lati; na ba latile. Isiňi... Sina Jesu hana ba omanyize, mi hape ni ku ba shwela. Mwabona, “Ndate, ba swalele; mane haba zibi

ni se ba eza.” Ku nahana, mutu ya bata kuba ya lukile, ni kulika kuba ya lukile, ni kubona diabulosi yani... Yani ki yena ye Ni lwanisa, sani si foufalyze meto a sicaba.

¹⁹² Naha ye i lukela ku tuka ka kanya ya Mulimu, ku bona se si ezahalile ku yena mwa lizazi la maungulo le, mafelelezo a. Ki kabakalañi ancafazo ye ha i sa fiti mwa linaha za kale? Kwanu ki kwa Likamba la Wiko neku la kwanu, kwa wiko kwa hulehule mo mu kona kuyela. Cwale lukwakwa lwa sibi lu wezi fafasi mwatasilaifasi, mi i sweli kutiba; libaka, mi Los Angeles ni Hollywood, lisweli kutiba ka mainci amañata luli ka hola, hakuna mukwa wa ku lituhelisa. Eeh, ki luna ba. Buñata bwa nako kaufela lu utwa lipizo ze. Haiba mu ziba sani...

Cwale, kusike kwaba ni mutu ya katona. Kono haiba mu ziba, kuzwa mwa pilu ya mina... Na mi kupa. Hanikoni kuziba ze mwa lipilu za mina, kwanda kuli Mulimu a li patulule. Kono kuzwa mwa lipilu za mina, haiba mwakona kubona kuli hamuyo fo mulukela kuba ni Mulimu ni Linzwi la Hae, mwa tumelo, mu nanule fela lizoho la mina ku Yena, mu Mu bulele kuli, “Mulena, U ni tuse.” O Mulimu! Kwande a keleke ye, kutezi, kutezi babañwi kwa bukaufi ni limota, mwahali ni kwande, mane ki mazoho aeza mianda anda, mwendi ki mazoho aeza mianda yemibeli a nanuhile. Ni itumezi kwa busepahali bwa mina.

¹⁹³ Jesu yomunde, usike wa lumeleza kuli alimuñwi wa bona ku lateha. Kakuba mutanga Hao, ya yemi mwahala baba pila ni baba shwile, kuba supeza, ka munwana, kwa Linzwi la Mulimu. Hani koni ku ba pilisa, Mulena, kono ba bata ku piliswa. Mi, Ndate, sina ha Ni bulezi linako zeñata, lizazi li pazulanga kakusasana; mi halinze litaha kusila lifasi ewalo, li lumilwe ki Mulimu ku to buzwisa lipeu, ku eza lico za mubili kuba ze pilisa mubili. Kono, O Mulimu, No bulezi kuli, “Ku baba saba Libizo la Hae ba ka pazulelwa ki Lizazi la kuluka ni foliso mwa mafufa a Hae.” Tuhela Lizazi la kuluka, lona Linzwi la Mulimu, lipazula mwa lipilu za sicaba, ni lumonyi lwa foliso ya tumelo mwa Linzwi lani li alafe kusa lumela kaufela kwa Linzwi, ni kubatisa mwa mutalelela wa bana ba bashimani ni basizana ba Mulimu.

Ki ba Hao, Mulena. Ka Libizo la Jesu Kreste, sibeli sa kwanu ni kwande fa moyo, Na ba tisa baba nanuzi mazoho abona ku Wena kwa piliso ya mioyo ya bona. Amen.

Kwani moyo waka uka fumana (Kakai? Fa katala ye.)

Pumulo mwa buse... (ka tumelo Ni talima kwa buse ko Ni ya)

Bukaufi ni sifapahano, (kwani kona ko Linzwi liinzi)... sifapahano,
Kube kanya yaka kamita;

Kufitela moyo waka uka fumana
Pumulo mwa buse bwa nuka.

Jesu, uni buluke . . . (Kwani, kutakiswa ni Yena,
hanisa lata sesiñwi sa lifasi. “Ni beye ya
kokotezwi.”)

Kuna ni sibuba sesinde,
Ki ya batu kaufela, nuka ya ku foliswa,
Yebuba kuzwa kwa sibuba sa Kalvari.

Kwa sifapahano, kwa sifapahano,
Kube kanya yaka (halu nanulen i mazoho
aluna) kamita;
Kufitela moyo waka uka fumana
Pumulo mwa buse bwa nuka.

¹⁹⁴ [Muzwale Branham u ambola cwale kwa balizi ba lilimba—Mu.] “Ni utwa Mupulusi waka wa biza.”

Mutahe mi muswale kwa lizoho la yomuñwi, mi muli,
“Mulimu aku fuyole, Mukreste.”

[Muzwale Branham ubulela hape kwa balizi ba lilimba—Mu.]
“Ni utwa Mupulusi waka wa biza.”

Mwa utwa Kubateni kwa Hae? [Puteho ili, “Amen.”—Mu.]

Kwande kafo mwa moyo wa mawaile, mu swalane mwa
mazoho kaufela mina kwande kafoo, mi muli, “Mulimu aku
fuyole, Mukreste.”

¹⁹⁵ Mwa ziba, kuna ni siliba sa mezi kwa mulaho kwanu. Usweli
kunga batu baba apezi Libizo la Hae. Haiba ha mu si ka
kolobezwa ka Libizo la Jesu Kreste kwa swalelo ya libi za mina,
kuna ni siliba, kuna ni liapalo, kuna ni mutu ya yemi inza
itukisize. Mu amuhezwi, haiba ka niti mwa amuhela Jesu kakuba
Mupilisi wa mina ni ku lumela kuli yani ki Niti.

¹⁹⁶ Muhupule, ne ku si ka ba mutu ni yomukana mwa Bibele,
kamba ka nako kaufela kusika ongaongiwa kale keleke ya
Katolika, yakile a kolobezwa ka nzila isili kaufela kwanda
Libizo la Jesu Kreste. Hakuna sibaka se si fumanwa mwa
Mañolo, kamba ku za kale, kuli mutu kaufela yakile a
kolobezwa, mwa Keleke ya Mulimu ya pila, ka libizo la
malumbatina “Ndate, Mwana, Moya o Kenile.” Ki tuto ya tumelo
ya Katolika, mi ha ki tuto ya Bibele.

¹⁹⁷ Ne ni ikambota ni muprisita, ki ha Ni mu buza. Ki hali,
“Yani kona niti. Kono luna lu keleke; lwa kona ku cinca so lu
bata kaufela. Mutomo wa lika uinzi mwa keleke. Mulimu u mwa
keleke ya Hae.”

¹⁹⁸ Ne niize kuli, “Mulimu uinzi mwa Linzwi la Hae. Mi haiba
keleke i cwalo . . .” Se nili, “Mulimu ki Linzwi. Mi haiba keleke
ya shutana ni Linzwi, konakuli Hani lumeli keleke.”

Ni tuhela kuli linzwi la mutu kaufela libe buhata, kamba ikona kuba muprisita, popu, seo kaufela akona kuba ona, mi Linzwi la Mulimu libe la niti.

Mi Paulusi na ezize kuli mutu kaufela, hakuna taba kamba na kolobelizwe, kamba na si ka kolobezwa ka Libizo la Jesu Kreste, kuli atahe ato kolobezwa sinca hape.

¹⁹⁹ Mi hasamulaho babañwi ba ma no amuhela Moya o Kenile, Pitrosi ali, “Kana ku na ni yaka hanisa mezi, ka kubona kuli nibona ba amuhezi Moya o Kenile,” Likezo 10:49, “ka kubona kuli nibona ba amuhezi Moya o Kenile sina luna kwani . . .” Mi aba laela kuli, “Musika zwa mwa sibaka se, ni ha mu amuhezi Moya o Kenile, mutahe mi mu kolobezwe ka Libizo la Jesu Kreste.”

Kakuli, Pitrosi na filwe sinotolo sa Mubuso, sa kuli, “Kaufela so ka tama mwa lifasi, Ni ka si tama mwa Lihalimu.” Mi ki sikamañi seo sinotolo si ezanga? Sa kiululanga sika sesiñwi, likunutu.

²⁰⁰ Mi cwale Jesu hana bulezi kuli, “Muye, mu ba kolobeze ka Libizo la Ndate, Mwana, Moya o Kenile,” neli kubeya zani fale kuli afoufaze ya sa lumeli.

Mulemuhe! Kiñi Pitrosi ha na sika lwala sani, linzwi ka linzwi? Na nani kueza sani.

Haiba mutu u kolobezwa ka malumbatina, “Ndate, Mwana, Moya o Kenile,” konakuli ha si ka kolobezwa ni hanyinyani; ha a na Libizo. *Ndate* ha ki libizo, *Mwana* ha ki libizo, ni *Moya o Kenile* ha ki libizo. Moya o Kenile kona seo Uli sona; sina, Na ni mutu. Ki Moya o Kenile.

Ndate ki lilumbatina; Na ni ndate. *Mwana* ki lilumbatina; Na ni mwana. *Mutu* ki lilumbatina; sani kona se Nili sona. Kono libizo laka kina William Branham.

Mi Libizo la Ndate, Mwana, Moya o Kenile kona Libizo la “Jesu Kreste.” Jesu naize, “Nitile ka Libizo la Ndate.” Libizo la Ndate ki sikamañi? Mwana kamukana utahanga ka libizo la ndatahe. Mi Libizo la Ndate ki Jesu Kreste. Mwabona? Mwabona se Ni talusa?

²⁰¹ Kambe Ne ni ka mi bulelela kuli muye mu yo ni ngela sika kwa sintolo kwanu, ka libizo la tuyemeli wa tolopo. Ki babakai baba ziba libizo la tuyemeli wa tolopo kuli ki mañi? Mulikana ka yomunde, Rich Vissing. Kihande, ne mu si ke mwa ya kwani mi mu yo bulela kuli “ka libizo la tuyemeli wa tolopo.” Mu li, “Ka libizo la Richard Vissing.” Mina sicaba kwanu mwa Jeffersonville mwa ziba yo ali yena.

Mi lani kona libaka Ha na ize, “Ndate, Mwana, ni Moya o Kenile.” Ku Yena kupila Bumulimu, mutalelela wa Toho ya bumulimu ka mubili. Na bulezi kuli, “Mu ba kolobeze ka Libizo la Ndate, Mwana, Moya o Kenile.”

²⁰² Pitrosi ha natilo yema ni sinulo ku yeo Na yahile Keleke, ya Yo Nali yena, na ize, "Mubake, mutu ni mutu wa mina, mi mu kolobezwe ka Libizo la Jesu Kreste." Mi musike . . . Linotolo za to fetuha mwa Lihalimu ni mwa lifasi. "Hakuna Libizo lisili mwatasa Lihalimu le lifilwe mwahala batu le mu lukela kupiliswa ka lona."

²⁰³ Ki kabakalañi ha mu kolobeza ka Libizo la Jesu Kreste? Kwa swalelo ya libi. "Yo kaufela mu ka swalela libi, ku yena si takuzwi." Mwabona? Kono haiba ha u nahani kuli wa lukela ni ku swanelia ku kolobezwa, usike wa eza cwalo. Kakuli, ha uka eza cwalo, fani kona fo lifelela, mwabona. Mwa utwa se Ni bulela kana?

Ni utwa Mupu- . . . (yena Linzwi) wa biza, (wa
biza kwani kwa libita)
Ni utwa . . . ("Kana hauna kushwa ni Na, kuli
u zuhe ni Na?") . . . -pulusi wa biza,
Ni utwa Mupulusi wa ka wa biza, (kana lifasi
li ka bulela sikamañi?)
"Lwala sifapahano sa hao, mi ulatelele,
ulatelele . . ."

Cwale, haiba mwa samba kuba:

Kwa Ka (Yena ki Linzwi) ani isa Ni . . . (siliba
ki sani)
Kwa ka Ni isa Ni ka latelela,
Kwa ka Ni isa Ni ka latelela,
Ni ka ya ni Yena, ni Yena nzila kaufela.

Halu inamiseni litoho zaluna.

²⁰⁴ Mulimu yomunde, siliba si lukisizwe. Cwale ambola kwa lipilu zaluna, Mulena. Mi ha ba utwe Kreste, yena Linzwi, ku ba biza, mi ba zamaye ni Yena mwa nzila kaufela.

"Ni ka ya ni Yena mwa simu kaufela. Ni ka ya ni Yena kwa siliba. Ni ka nga Libizo la Hae. Ni bata kuba alimuñwi wa sicaba Sa sweli kubiza ka Libizo la Hae. Ni ka lumela Linzwi la Hae. Ni ka latelela. Hanina ku bapala ni lifasi. Ni ka ba wa niti, Munyaliwa ya beeelizwe. Hanina ku siya ni haiba taku iliñwi ya Linzwi la Hae. Kupo kaufela, Ni kaba wa niti, Munyaliwa wa niti. Lika kaufela Za ka ni kupa kuli ni eze, kona ze Ni ka eza.

"Mi haiba Muuna ka ya sa taha uka lumeleza milili yaka kuhula, Ni ka eza cwalo. Haiba U bata kuli ni zuse mipende ye kaufela, Ni ka eza cwalo. Haiba U bata kuli . . . A ni bulele kuli ki moyo o maswe, ya maswe ye Ni bapala ni yena, ni litino ze bonahala ze mapunu; Ni ka eza cwalo, Ni ka i zusa kwateni. Hanina taba ka sa bulela mutu kaufela, Ni ka li zusa kwateni.

"Ubata kuli ni zwe mwa sikuwata sani se Ni li kusona, sa baba sa lumeli, Ni ka eza cwalo; Ni ha ni ka panga sinkwa saka, kamba seo kaufela sili sona. Na sepisize kuli Hana ku ni siya kamba

ku ni yaya. Nika—Ni ka si eza. Ni ka ya ni Yena mwa musipili kaufela. U ni bata kuli ni kolobezwe ka Libizo la Hae, Ni ka eza cwalo.”

Mulena, No li sepisize mwa Linzwi la Hao mo, sani kona so No bata. Mi mutu kaufela akone ku si bona, Mulena, mi ha munati, akubame ka buikokobezo ku Sona. Ka Libizo la Jesu Na lapela. Amen.

²⁰⁵ Muinzi kwa neku la Mulimu. Mi Mulimu ange manzwi amanyinyani a lobakilwe mi a eze kuba buniti ku mina, kona tapelo yaka ye sepahala.

Siliba si ka lukiswa. Yo kaufela ya lata kutaha, bana ni . . . Mukutazi uka zibahaza sani kasamulaho. Mutu kaufela ya bakile mi ubata ku kolobezwa, ka kuitusisa Libizo la Jesu Kreste, mutahe fela ona cwalo. Mutu kaufela uitukisize. “Lika kamukana li lukile.” Lik a kaufela ze lukona kueza kuli lu mi tuse ku pilela Mulimu, luteni mo kuli lu eze cwalo. Mulimu ami fuyole.

²⁰⁶ Cwale halu yemeñi. Cwale pina yaluna ye likani, *Na Mu Lata*. “Na Mu lata kakuli Na ni latile pili.” Halu i opeleñi, mutu kaufela cwale.

Na Mu lata, . . .

Halu nanuleni mazoho aluna halunze lu i opela.

. . . Na Mu lata
Kakuli U ni latile
Ni kuleka puluso yaka
Fa kota ya Kalvari.

Ni litoho zaluna ni lipilu ze inami cwale, halu i ñuñuneleñi ku Yena. [Muzwale Branham ukala ku ñuñuna *Na Mu Lata*—Mu.]

Na Mu lata.

[Muzwale Branham uwewela pili ku ñuñuna kuli *Na Mu Lata*—Mu.]

O Mulimu, Ndata luna, lu utwele butuku luna libupiwa ze shebile, Mulena. Lu tiise ka musebezi o libelezi fa pila luna. Aku ni tuse, O Mulimu, ni tuse! Ni ikutwa kuli sesiñwi siteni ona fa, Ndate. Ni tuse, O Mulimu, kuli ni zibe Niti. Fuyola sicaba se, Mulimu yomunde. Ba etelele, Na lapela, ka Libizo la Jesu.

²⁰⁷ Cwale halunze lu inamisa litoho zaluna, Ni ka kupa bo mulisana kwanu, Muzwale Neville, muzwale wa luna yomunde, atahé kwanu cwale mi abulele sa bata, kuama litaba . . . ka za kolobezo. Ni ka sana na zibahalisa sani. Na sepa siliba si kwaluhile, nihakulicwalo.



MULIMU WA LUSIKA LOLU MASWE LO LOZ65-0801M
(The God Of This Evil Age)

Liñusa le ka Muzwale William Marrion Branham, neli kutilizwe lwa pili mwa Sikuwa la Sunda kakusasana, Muyana 1, 1965, ili fa Branham Tabernacle mwa Jeffersonville, Indiana, U.S.A., iingilwe kuzwa fa tepu ya magesi ya manzwi ni ku hatisiwa kusina kuzusa sika mwa teni kuya Sikuwa. Toloko ye ya mwa Silozi nei hatisizwe ni ku hasanyiwa kiba Voice Of God Recordings.

LOZI

©2017 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Zibiso ya bahatisi

Litukelo kaufela li bulukilwe. Buka ye yakona kupulintwa fa pulinta ya mwa ndu kuli iitusiswe ki mutu kamba kuli ifiwe ku yomnwi, mahala feela, kakuba siitusiso sa ku hasanya Evangelí ya Jesu Kreste. Buka ye hailekiswi, kuatiswa mwa buńata, ku nepelwa fa moyá wa webusaiti, ku bulukwa mwa mukwa wo bunolo, ku tolokwa mwa mishobo isili, kamba ku itusiswa kwa kukupa masheleńi ku sina tumelelano niba Voice Of God Recordings®.

Ka litaba zeńata kamba ka libuka zeńwi ze liteni, shangwe muńolele kwa:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org